


MUTAMIWA

 ...kwanu hape, ka Libizo la Mulena Jesu, ni ku utwa misebezi yemituna ye komokisa Yo ezize, sapili. Mi cwale lu yemi ni tibeledo, ye nanula tumelo ya luna ni ku lu toza, ka ku lumela kuli ze kupilwe busihu bwa kacenu li ka alabiwa. Wena uziba yeñwi ni yeñwi ya zona, ze bakupile kamukana. Mi lwa ba lapelela, sihulu, Mulena, bani baba sutelezi luli fakaufi ni lifu. Akutise kozo kwa mioya ya bona haiba ha i yo teni mwani. Akutise foliso kwa mibili ya bona. Lumeleza sani, Mulena.

² Fuyola kutaha kwa luna hamoho. Lwa—lwa lapela, Mulena, ka mukopano wa busihu bwa la Bulalu wo, kuli, sina ha lu kopani, ka kuziba kuli kaufela ko ku kopani bababeli kamba babañata hamoho, Uka ba ni luna. Mi lwa Ku kupa, Mulena, kuli ulufe Linzwi la Hao busihu bwa kacenu. Bulela ku luna, Mulena, mi ufutumaze lipilu za luna, ka bunca, kuli luzibe mwa ku ikutekela ili luna ka nako tuna ye libelezi kwa pili, sina ha lu lumela kuli lu se lu atumela Kutaha kwa Mulena.

³ Lwa itumela ku Wena ka sicaba cwale se si kala kufumana tumelo kuba yende ku sona, ni kuziba seo tumelo ili yona. Ni kuziba, mane nihaiba ku itumela ku Wena ka lisebelezo zesali kwa pili, ka ku lumela kuli Uka eza taba yeñwi. Mulena, lwa libelela ka tibeledo, sina mazazi akale, lu lumela kuli nako i sutelezi fo ha Uka nanula mahaulo a Lihalimu ni kusulula lisepiso zeo Mulimu u sepsize mwa lizazi la maungulo le.

⁴ Cwale lwa Ku kupa, Mulena, kuli—kuli u be ni bao kamukana, mwahala linaha, sina kacenu ha lu utwile babañata hahulu ba baliteni, kai ni kai, ba ba tokwile. U alabe likupo za bona, Mulena. Mi lu lapela kubona lizoho lelituna la Mulimu kuli lizamaye mwa lifasi kamukana mwahala baba libelezi taba tuna ye.

⁵ Ulu swalele libi za luna. Lu shape, Mulena, ka Moya wa Hao ni Linzwi la Hao, kuli lu kone ku ikuteka ili luna, batanga baba utwela, batanga baba utwela mwa tato ya Mulimu. Halu hupuleñi, ni kulika ku nahana mwa lipilu zaluna, sene ba ezanga Bakreste ba pili. Ki batu ba mufuta mañi bene luka katana kambe ne luka kopana ni bene ba kopani ni Wena. Ka mo lipata za bona ne li ka tuka ka tumelo ni tabo. Ka mo bupilo bwa bona ne bukaba Linzwi la Mulimu lelipila, kuba fela “mañolo añozwi abalwa ki batu kaufela,” hane ba zamaya mwahala sicaba. Mulimu, ulu alabe hape.

⁶ Mi bupilo bwa luna ha bu be bwa kuipeya ku Wena, kuli Moya o Kenile U kone kupila kufitela ku luna, mi bulela kufitela ku luna, Mulena. Halu hupuleñi, mwa minahano yaluna, halunze lu zamaya mwa mikwakwa ni ku ngubana mazoho ni lifasi, ha lu

lukeli kuba sina bona. Mi lu zamaela kwa tuko ni kubafa sibaka, Mulena, mwa sibaka sa bona se si swaneleha fa lifasi. Lu ka ina kwa lipula za kwa mulaho, lu nze luziba kuli lu lindumeleti za lifasi lisili. Luna ni Mubuso o taha mwa tamaiso, Mulena. Mi Mulena luna yomutuna uka fita cwanofu ni ku to yola mibuso kaufela yeli mwa sibaka sa Hae. Mi Uka busa ni ku zamaisa; ni Yena fa lifasi fa, myaha ye likiti, ni kuba ni Yena kamita.

7 Ka se mwa minahano, Mulena, cwale lu talima ka ku libelela kalabo ya tapelo yaluna. Lu talima kwa buipuleli bwa luna. Haiba lu ezize sika kaufela, lu bulezi sika kaufela, kamba ku nahana sika kaufela, sene sili ka ku shutana kwa tato ya Hao, tuhela Mali a Jesu Kreste alu kenise.

8 Lu etelele, Mulena, sina kezeli ha bulezi busihu bwa kacenu, ka za hae ni muuna hae mwa musipili wa kuya kwa Chicago. A ku ba etelele, Mulena Mulimu, kwa sibaka So ka kona kuba bona, kuli babe mamonyi a liseli ku babañwi baba bubutela mwa lififi, bona baba sa zibi Mulena luna Jesu. Cwale lu beya sebelezo ku Wena, ni kuteeleza kwa Linzwi la Hao la sikuluho, kuli lu kone kuziba mwa ku ipaakanyeza hola tuna ye, ka Libizo la Jesu lwa likupa. Amen.

[Hakuna manzwi fa tepu. Muzwale Neville wa bulela—Mu.]

Mulena aku fuyole. Ni itumezi, muzwale.

9 Ne ni sa libeleli taba ye ni hanyinyani. Na, ka kuba kwanu kwa ndu, Ne ni ikutwa kuli haiba Ne ni si ke na ya kokuñwi, ka sipundumukela, Ne ni ka ikutwa bumaswe hahulu, na ni nze nili kwa ndu mi ni si ke na taha kwa mukopano. Mi se Ni ipumana mwahali mo, ni si ka libelela, na kasibili, nihaiba kwa lubasi lwaka. Kona ni sa zo kena fela, ni ku nanuha ona fani. Mi kacwalo se Nili, “Naya kwa mukopano wa litapelo.” Mi mane na sina nihaiba nako ya ku itukisa kutaha, kacwalo na sika ziba kuli Ne ni taha.

10 Kacwalo Ni tabile ka ku utwa bupaki bwa kezeli kwani, kaza muzwale, kuama Liseli lani kwa Mboela wa Carolina kamba Mutulo wa Carolina, kokuñwi. Greenville, neli kwani kana? [Kezeli uli, “Batili. Southern Pines.”—Mu.] Southern Pines. Eeni.

11 Muzwale Lee Vayle nainzi kwanu kacenu. Ni mukolobelize, kacenu, mwa sebelezo ya kolobezo kwanu kacenu. Muzwale Lee Vayle wa ziba, ni bakutazi kwani, Muzwale Parker Thomas. Neku na ni. . .

12 Ni hupula kaza—kaza nako, kezeli hana kile aapeswa ki muluti. Neli tiisezo yetuna, kezeli, ku sa na. . . Moya o Kenile fokuñwi uka lu tuhelela kuli luzwelepili ni kutatuba tumelo yaluna, ku bona, ni kutatuba tumelo ya babañwi. Ha mu talima kulibana ni sika sesiñwi, ni kubona sika, ni ku si bulela; babañwi ba talima mi ha ba si boni, bali ha si yo. Mwabona? Kono si teni.

13 Cwale, ne kusina mutu yana kona kubona kuli Liseli neli lepelela fahalimwa Paulusi, kono Ne liliteni. Hakuna yana boni nkwilimba yani ha i shetumuka kuzwa kwa Lihalimu, mwa Liseli lani, mwa mufuta, ni ku to lepelela fahalimwa Jesu, kwanda Joani kasibili. Kono ne I liteni. Mwabona?

14 Mi kacwalo, he, hasamulaho hane Ni bulelela batu kuama ona Liseli le kakuba sina Siita sa Mulilo, hakuna yana bata ku lumela za teni. Kono cwale liito la lipangaliko za kamera la to zibahalisa Sani, kamo ne Sitezi.

 Mi moya o maswe ki omunsu.

15 Kuswana fela sina bupilo bwa luna, luna lu muluti. Mi lu . . . Haiba lu liseli, mo ko haiba bupilo bwa luna bu zamaelela ni Liseli la lizazi la kacenu, lu zamaya mwa Liseli.

16 Kuswana fela sina ha mu talima fande mi mubulela kuli, “Na bona lizazi,” mwa nako ya musihali. Mu—mu bona muluti wa lizazi. Ki ku monyeha kwa muluti wa lizazi. Ha ki lizazi, luli, kono si paka kuli kuna ni lizazi. Si paka kuli kuna ni lizazi.

17 Mi cwale ha Ni bona, sina ha muinzi cwalo, ka kuitusisa za kufukisa moya, mwa bulela, fo kutalusa kuli mwa pila, kono wani ki muluti fela wa bupilo.

18 Kakuli, sika kaufela si lukela kuba ni lififi ku sona, kuli si pange muluti. Mwabona? Kakuli, muluti una ni kuba ni lififi hahulu ni liseli hahulu, kuli upange muluti. Mi halikoni kuba lififi fela, mi halikoni hape kuba liseli kaufela. Haiba ki bunsu, ki bunsu bwa luli. Haiba ki liseli, hakuna muluti, hakuna sesikona kupanga muluti. Kono haiba likopana bunsu ni liseli, lipanga muluti.

19 Kacwalo luna lu muluti ya liseli. Cwale mu monyeha bupilo bobuzwa kokuñwi. Haiba mu cwalo, mi Bakreste, se kakuba muluti, si bonisa kuli kuna ni Bupilo ko musike kushwa, kakuli bupilo bo bu na ni lififi ku bona. Mwabona? Kono ki muluti, kakuli mwa pila, sibupiwa se si zamaya ka mata a kubona, ku nahana, kushenya, ni kubulela, mi likutwisiso ze ketalizoho za mubili. Kono niteñi kana mwa ziba, zani, za shwa. Mi kuna ni butata bobutuna hahulu. Mwa ziba, ikona fela kuba . . . Ki mubonahalelo wa muluti, mwabona, kuli kuna ni bupilo ni lifu ze kopani hamoho.

20 Za butu lina ni kushwa. Kono haiba mwa monyeha, ka bupilo bwa mina bwa butu, ona Liseli la Lihalimu, konakuli muka bonahalisa Bupilo Bobusafeli, Mulimu. Mi cwale hamuka shwa, hakusana mukwa usili kwanda kuya kwa Liseli lani, kakuli Sani kona se mubile mu monyeha.

21 Haiba mu ba lifasi la bunsu, muka bonahalisa ona sani, mi mwakona kueza, kuli hakuna nzila isili ya kuya ka yona konji ya lififi. Mwabona? Kacwalo lu mwa ponahazo. Kacwalo, lwa bona

sani. Mi kaniti sina Moya o Kenile haunzo bonahalisa Liseli ni Bupilo, kacwalo ni lifu libonahalisa lififi.

²² Mi fa kuna ni zepeli zeo. Kamus- . . . Kwa mafelelezo a biki, mwendi ka la Sunda, luka nga siswaniso se si nyinyani ni ku sihulisa kuba se si tuna, kuli sikone ku beiwa fa limati la papazo.

²³ Fani, fo ku lepelela siswaniso sa *mina* fa limati la papazo. Hani zibi kamba mu lemuhele sani, kamba kutokwa. Mi he . . .

Mi mwendi mwahala biki yefelile, mwa—mwa Jamaica, kone Ni sweli ku hasanya evangeli . . . Lwa lumanga matepu lifasi kaufela ko likuwa. Mi *Limamatela Ze Supa* likutile mwa . . . mwahala libaka za Jamaica, kwani mwa hali. Mi kusialezi hahulu kwani mwahali mwani, kwa mulaho a lilundu la Blue Mountain. Mi bañi ba naha, fokuñwi, bana ni—ni tepu rekoda ye lu ba isezanga, se mu lukela ku—ku, sina Victrola ya kale, ku ipikulusa, mi cwale ni kutuhela kuli—kuli ilile cwalo. Mi, ka mizuzu yelikani kaufela, mutu ulukela ku ipikulusa.

²⁴ Sikwata se ne sina ni—ni batri ye nyinyani, batri yelikani ya ma volti a silezi, kamba sesiñwi se si cwalo, kuliza tepu rekoda. Mi neba—neba inzi kaufela bona hamoho, inge babali mo busihu bwa kacenu, kuteeleza kwa *Maswayo* ani, Na sepa neli zona. Mi ha ne Ni sweli kubulela, neba lemuha, kutaha mwa muzuzu, kwa taha ona Siita sa Mulilo sani, sa taha fa halimu fo ne kuna ni tepu rekoda yani ni kuto lula fahalimwa yona. Mi baya ku yo nga kamera ni ku to pikica siswaniso sa Teni. Mi sona sesiswana Sani, ki Sani fale, sinze si lepelela fahalimwa yona fani. Cwale lwa sihulisa, kuli lukone ku si beya fa—fa limati la papazo, kuli mukone ku si bona.

²⁵ Lu itumezi hahulu ka muhau wa Mulimu o tisizwe mwahala . . . luna fa Pila Kubateni kwa Hae mwa lizazi le. Cwale luitumela ka lika zeñata.

²⁶ Cwale Ni sepa Ni ka talima mwahali mo mi ni bone haiba Na kona kufumana zeñwi, ze ñozwi zeñwi kamba cwalo, sesiñwi se Ni kile na bulela fateni. Kamba, kulufa mufuta omuñwi wa—wa . . . Ni na ni ze ñozwi fa, nihakuli cwalo, kwa mulaho kwanu mwa buka. Haiba Ni kona kufumana iliñwi, mwendi Mulena ukanifa sesiñwi sa kubulela ku sesiñwi, halunze lu lapela.

Cwale, lu mwatasa tibeledo ya la Sunda.

²⁷ Ni bile ni bulela mwa Mañusa. Mi, la Sunda, ne ni mi bulukile mo nako yetelele, kaza kuli, “Kiñi ha u Ni lilela? Bulela kwa sicaba kuli si ye kwa pili.”

²⁸ Cwale, la Sunda ikaba sebelezo ya kufolisa ko bakuli bana ni ku lapelelwa. Cwale, mutahe bukau fi ni yakula, mi kuna ni kuba ni libaka leo bakuli, ha lu ba lapelela, haiba habafoli. Mi Ni bata kuli, haiba nji Mulena alata, ka kutazo fela yekuswani la Sunda kakusasana, hape. Kacwalo, Ni kaba ni sebelezo ya foliso, ni ku lapelela sicaba kaufela. Mi Billy Paul kamba babañwi ba kubona

baka ba kwanu la Sunda kakusasana, ka eiti kiloko, fani keleke haikwaluha, kuli bafe batu makadi habanze ba kena cwalo mwa munyako, kamba ka nako kaufela ha ba kena.

²⁹ Mi cwale, he, Ni bata kulika, Na lumela Mulena ka neku leliñwi unifiye pono fa mabaka ao batu babañwi ha ba sa folangi. Mi Na—Na lumela ki kutokwa kutwisiso. Mi Na—Na lumela, mwendi, luka bulela ka zani, la Sunda kakusasana, haiba Mulena alata.

³⁰ Cwale, la Bulalu busihu mukopano wa litapelo ki omukuswani fela ko lu taha hamoho ni ku lapela, sina mo lu ezelize, ni kuba hamoho.

³¹ Fokuñwi, Na—Na lumela iliñwi ya lika zetuna ze Ni fumana mwa lizazi le, ki kutokwa tiisezo mwa lika ze lu lumela. Mwabona? Mwabona? Haiba Mulimu, mwa mazazi a John Wesley, na ka eza mwa lizazi lani Sa ezize kacenu, ki sikamañi sene si ka ezahala; mwa mazazi a Martin Luther, kamba mañi kaufela? Sina halu Mu bona ha eza, sibeli cwalo lipakilwe ka Keleke, ka Moya; mi ni ka sayansi, ni muzamao kaufela, ku—ku kopana kwateni ku lukela ku zibahala. Mi Linzwi la Mulimu kwanu la Li paka ni ku Li bulela Li sika taha kale. Mi ni ku zamaya cwalo, ni kupolofita, ni ku bonisa ona sika luli sa Na bulezi. Li ka to ezahala ka kupetahala, ona cwalo sa Na bulezi. Mi niteñi lusali baba buzwa, inge kuli lwa komoka. “Kulukile, ha ni zibi haiba sani si kona kutalusa na? Ha ni zibi haiba si kona kutalusa ona—ona keleke, mwa buñwi. Kamba—kamba, ha ni zibi haiba Ni mwateni ku Ze?” Na sepa, la Sunda kakusasana, Ni ka lika ku bulela fa litaba zeñwi zani ze kona ku lualifisa nyana.

³² Cwale, busihu bwa kacenu, Ni fumani sika sesiñwi, lu sikuluhele fela kusona fa, Ni sika taha kale. Na hupula, “Kucwani kambe Muzwale Neville, haiba Ni kona kuyofita kwani, na bulezi kuli, ‘Nanuha mi ubulele,’ mi uine fela fafasi?” Mwabona? Na hupula, “Ki hande ni ñole Mañolo nyana.” Kakuli, Na ziba, yena, ki mushimani yalatiwa luli, mi lwa—lwa itumela ka yena.

³³ Lusika lapelela kale fa Linzwi, Ni bata ku lemuha mu—mu muzwale. Ha ni koni nihaiba kubiza libizo la hae ka nako ye, bababeli ba bona. Bateni kwanu, balikani ba ka. Bani . . . Ki babuleli ni bahasanyi ba evangeli, mwa simu, ku zwela fande. Ba utwile Mañusa a ka tepu. Mi bazwa mwa likopano za likeleke ze shutana, mitangana yemibeli ye minyinyani. Mi mushimani u cwalo, alimuñwi wa bona na tabezi hahulu, kufitela ha fufela kwa, Tucson, cwanoñu nyana, ka kukwala mukopano. Na sepa Ne nili mwa Mukushuko wa Baana ba Pisinisi. Mi mutangana yomunyinyani, mucaha yomunde, ataha kwani. Mi yena ki . . .

³⁴ Bazwa kwa Kansas. Mi batile musipili o kaufela kuli ni banyalise. Na itumela ka sani. Ku nahana kuli sicaba sesi lumela mwa litapelo za hao, hahulu, ku lumela kuli Mulimu wa kona

ku utwa ni ku alaba; batu baba nyinyani baba kala bupilo, sina cwana. Mi hane ba fitile kwanu kuli ni banyalise, maabani, ku fumana seo mulao wa Indiana utokwa, kuli nihaiba ka seo mali abona atatubilwe, ku libelela mo mwa tolopo, mazazi amalalu, ba si ka nyalana kale. Kacwalo, habakoni ku nyalana konji ka la Bufaifi kakusasana.

³⁵ Cwale Ni ka kupa muzwale wa luna kwani kwa mafelelezo, haiba akona kuyema alu bulelele yo ali yena, ni kalibe wa hae mulatiwa yomuninyani kwani, ni muzwale yomuñwi.

³⁶ [Muzwale ubulela kuli, “Ni itumezi, Muzwale Branham. Ki tabo kuba mo. Mi Na kina Muzwale Roger O’Neil, ni pila mwa Kansas, ni zamaile mwa masimu, sina mubuleli, hana bulela kuli, ‘Jesu wa pilisa, wa folisa, ka tumelo ku Jesu . . . ? . . .’ Na kamita na itobohanga . . . ? . . . Yo ki mulatiwa wa libato laka, Patricia Brown. Lu ka nyalana, la Bufaifi. Yo ki mubuleli ye lu zamaya ni yena mwa musebezi, Muzwale Ronnie Hunt, kwanu kwa neku le. Mi yo ki mulatiwa wa libato la hae, Carol . . . ? . . . Mi lutabile fa kuba mo busihu bwa kacenu.”—Mu.]

³⁷ Ni itumezi, hahulu luli. Kaniti lu lakaleza lindumeleti ze nyinyani ze, kwa musebezi wa Mulena Jesu, limbuyoti za Mulimu, ku ba akufisa mwa musipili. Mi sina ha Ni libelela, ku libelela Kutaha kwa Mulena, ni kubona mitangana ni basizana ba banyinyani ni mulelo mwa pilu, kuli basebeleze Kreste, sani sa ni tabisa, mwabona, ku ba bona ha ba hula ona cwalo. Mulena ami fuyole, kakutala, muzwale waka, kezeli.

³⁸ Cwale halu apuleñi mwa Buka ye nyinyani yeo Ni sika bulela fateni ka yona ni haisali, mwa bupilo bwaka. Mi ki yona kiye . . . Ki kauhanyo iliñwi fela, ki Buka ya Filemoni. Mi yona ki . . .

³⁹ Ni mu Irish ka bu nyinyani, mi Ni—mi Ni na ni waya kwatasa meno aka, ili kuswala amañwi hande kwa mulaho mwa sibaka. Na, Na, fokuñwi ha Ni bulelangi manzwi a hande, kono Na ziba sa li sona. Mi fokuñwi ha Ni koni ku abulela hande ka swanelo, bakeñisa kutokwa tuto. Kacwalo, “Filemoni,” yomuñwi naize kwa mulaho kwani, seo Ni nahana kuli kona mubulelelo o lukile wa teni.

⁴⁰ Cwale, timana ya 1, Ni bata kunga fela linzwi lililiñwi kamba amabeli kuzwa fani.

Paulusi, mutamiwa wa Jesu Kreste, . . .

⁴¹ Mi sani kona se Ni bata ku itusisa busihu bwa kacenu, kakuba taba, haiba Mulena alata, kikuli: *Mutamiwa*.

⁴² Cwale, hamukoni ku nahana kuli Paulusi wa kona kuipala kuba mutamiwa. Mutu yana pepilwe ali ya lukuluhile, atalizwe ka Moya o Kenile, kono ibo uipiza “mutamiwa.”

⁴³ Mi cwale lu fumana cwana, hana sweli ku bulela ni Makorinte, “Paulusi, muapositola wa Jesu Kreste.” Nako yeñwi, “Paulusi, mutanga wa Jesu Kreste ka tato ya Mulimu,” hasweli

ku bulela ku Timotea, ni baba shutana. Cwale hasweli kuñola fa ku ñolela Filemoni, na ize, “Paulusi, mutamiwa wa Jesu Kreste.” “Paulusi, muapostola,” Ni tabela kukutaza busihu bulibuñwi ka sani. “Paulusi, mu—mutanga,” kukutaza ka sani. Mi cwale, “Paulusi, mutamiwa.”

⁴⁴ Kono, busihu bwa kacenu, kakuli kukanga liholo kuli mulemuhe hande iliñwi ya lituto zani, Ni ka lata kunga, busihu bwa kacenu taba yetwi, “Paulusi, mutamiwa,” ni kunga tuto yeli: *Mutamiwa*.

Cwale ha lu inamiseñi lito ho zaluna fa nako nyana fela.

⁴⁵ Mulena Jesu, mutu kaufela, zani za konahala ka butu, kwa konahala kuapula makepe a Bibeles ye, kono konji ka Moya o Kenile kona o kona ku Li toloka mwa liseli leo li lukiselizwe ka lona. Lwa Mu kupa kuli atahe cwale mi alutuse ku utwisisa seo sili sona, ana bulela, mupolofita tuna, ya mata yo, Paulusi, mi ibo uipiza kuli “mutamiwa.” Cwale Moya o Kenile upatulule ku luna halunze lu libelela ku Yena, ka Libizo la Jesu Kreste. Amen.

⁴⁶ Cwale Na hupula, Paulusi, ha na ñozi liñolo le ku Filemoni, ka mwana bezi mwa tolongo, mwani mwa musima wa muleneñi, nali—nali—nali mutamiwa. Mi nakonile kuziba hande, ka siyemo sa hae sene litalusa linzwi lani. Na potolohilwe ka—ka—ka lisipi. Na—na ka kona fela ku lukululwa haiba yomuñwi na ka mu lukulula. Mi na zibile sene si talusa kuba mutamiwa. Mi cwale, hape, Ni lumela kuli mu—mu apositola na talusa fela. . . na sa talusi kuya ka buino bwa nali ku bona nako yani, kakuba mutamiwa wa—wa mubili wa hae ali kuina mwani—mwahala tolongo ye. Kono Ni lumela kuli na talusa buino bwa—bwa hae, moya wa—wa—wa hae, tato ya hae, kakuba mutamiwa ku Jesu Kreste.

⁴⁷ Cwale, luna kaufela lu pepilwe, luli batu baba na ni tukuluho ya buiketelo, kueza buiketelo kaufela bo lu lakaza kueza. Mulimu u ezanga zani ka kuluka. Kakuli, U na ni kubeya mutu kaufela fa mayemo a swana, kusi cwalo Na beile mutu ya maswe fa. . . Na beile mutu wa pili fa mayemo a maswe, ya Na beile fa tukuluho ya buiketelo. Mwabona? Luna luinzi fela ona cwalo, busihu bwa kacenu, sina Adama ni Eva. Hakuna shutano. Bunde ni bumaswe buinzi fapila mutu ni mutu wa luna. Bupilo ni lifu, lwa kona kupanga buiketelo bwa luna; kuitingile ku mina, kuli mupange cwalo. Mwabona?

⁴⁸ Cwalo kona mone ba ezelize bo Adama ni Eva, mi, mwabona, mi—mi neba ezize buiketelo bo bumaswe. Mi cwale, ka sani, sa beya lusika kaufela, lwa batu ba mibala, mwatasa lifu, koto ya lifu.

⁴⁹ Mi cwale Mulimu ataha fafasi mwa mufuta wa mutu mi atonga lifu lani, mi alifa koto ya lifu, kuli mane. . . sicaba sa Hae ne si lakalize ku—ku lukuluha ni kuya ka ku tamuluha.

50 Cwale, kambe Na lungile, kusina nzila ye swana ya Na ezelize ku Adama ni Eva, ka ku lu shelisa fela ku sesiñwi, ali, “Ni ka mi pilisa kamba mwa lata ku piliswa kamba hamulati,” konakuli Na beile Adama ni Eva fa—fa buino bo bumaswe, mwa bona. Kono mutu ni mutu wa luna una ni kuketa, zazi le, mwahala lifu ni bupilo. Lwa kona kueza cwalo.

51 Sina ha Ni sa zo bulela, haiba liseli lika paka, bupilo bwa hao bu ka bonisa se sili mwahali. Hanina taba kwa siemba soli kusona. So eza, zazi ni zazi, sipaka seo uli sona. Mu utwile mubulelelo wa kale, “Bupilo bwa hao bwa huwa luli, Ha nikoni ku utwa bupaki bwa hao.” Mwabona? Likezo—likezo za hao li bulela ka kuhuwa hahulu.

52 Na kamita ni lumela mwa kuhuwa ni kutulaka. Kono Ni bile ni bulelanga kamita kuli, “Usike wa tula ka kulenda hahulu kufita mo pilela, kakuli lifasi lika talima sani.” Mwa bona? Ulukela kutula ku likana ni mo pilela, kacwalo, kakuli mutu yomuñwi u ku talimezi. Mi cwale haiba . . .

53 Batu habana kutaha kwa keleke. Bona—bona, buñata bwa bona, habana kueza cwalo. Mi babañwi ba kubona, baba sa tahangi, ki batu ba basepahala. Babona kubola ko kuñata hahulu mwa keleke, kufitela ha ba sa lata kuba ni sesiñwi sa kueza ni zona. Mi linako zeñata, lu ambola fa muhupulo o bunolo wa sona, hamukoni ku ba nyaza, mwabona, bakeñisa mukwa—mukwa wa kezo ya sicaba. Baipiza kuba Bakreste. Ki sisitaliso sesituna hahulu seo lifasi linani, ki muuna ni musali ya i papata kuba Mukreste, kono ki ya pila ka ku shutana ni buipuleli bwa hae. Kaniti ku cwalo.

54 Cwale, kakuli ku kataha kuswaba kwa Katulo. Cwale, mueza libi, mukondoli wa bucwala, mulauli, litanya, yena—yena hana ku yo swaba ha ka yo utwa taba ya hae haibalwa, “Kuli akene mwa mulilo wa kamita.” Yena hana ku yo swaba. Kono muhaesu yani ya lika kuipata kwa mulaho wa mufuta omuñwi wa buipuleli bwa keleke, yani ki yena mushimani yaka yo swaba ka Lizazi la Katulo. Mwabona? Yanza i papata kuba Mukreste, kono inza pila ka nzila isili. Ne ku kaba hande kuli yena ya cwalo mane asike abulela zeñwi za buikankabeki bo bucwalo, kukala zani, kufita kushaka sika mi apile ka kushutana. Kakuli, yacwalo ki sisitaliso sesituna maswe ku ze lunani, ki muipapati yani ya bulela kuli—kuli—kuli ki Mukreste, kono upila ka kushutana.

55 Kamita, usike wa atula bupilo bwa hao ka buñata bwa mata onani a kueza limakazo. Mi ni luna halu ikatuli ka buñata bwa zibo yo nani ya Linzwi. Kono kamita muikatule ili mina, mutalime kwa mulaho ni kunga patisiso ya mufuta wa muselo o bu beya bupilo bwa mina ka nako ya cwale. Mwabona?

56 Sina hane Ni kotalize nako yeñwi yefitile, mwa mukopano wa baana ba pisinisi kwa Phoenix, Arizona, ka za ku bonahalisa Jesu, ku bonahalisa Bupilo bwa Sikreste. Ne niize kuli ne Ni

pepezwi kwanu kwa Kentucky, ko ku sialezi hahulu, sihulu kwa mulaho hane Ni sali mwanana. Mi mushimani nyana yo mane nasina ni—ni—ni—ni lapa sina ye luna ni kwanu, ko lu na ni likalibe zeñata zende hahulu ze iponanga mwa siiponi, mwa ndu kaufela, kuli babeye milili ya bona hande, ni zeñwi cwalo. Kono nana ni siiponi silisiñwi sesi nyinyani, kaemba fela kaka likani kene ka comekilwe mwa kota fande, kone ku fumaneha sipula sa kutapela, ko bo mahe ni bo ndatahe ne ba tapelanga, mi ne ba kamunanga milili yabona, ni zeñwi cwalo, fa kaemba kaka likani kale ka siiponi kene ka comekilwe fa kota.

⁵⁷ Kaniti, wani kona mufuta wa ndu ye lu nani. Mutu kaufela yabata kubona siiponi, luna banana, ne lu banga ni sipokisi mi lu pahama fa sipula sa kutapela, ni kotalima mwa kaemba kani ka—kani ka siiponi kene Ni nopile, na, mwa sileze. Kwani nesi kwa Kentucky. Kono ki kwanu mwa Indiana, kwani kwa Utica Pike kwanu.

⁵⁸ Cwale, mushimani yo na si kabe aipona kale iliyena sina cwalo. Kacwalo, natile kwa muleneñi, ku yo potela bo kuku a hae. Mi neli fa . . . Neli kwa kupotela sibaka sani sa baeñi, bo kuku a hae ne ba na ni siiponi se sitezi hande fa sikwalo. Mi kacwalo, mushimani yomunyinyani, inza matamata mwa—mwa sibaka, abona mushimani yomuñwi yomunyinyani kwa pata a hae. Mi mushimani yomunyinyani yani nasweli kumata, ni yena. Mi kiha hupula kuli ayeme fa mizuzu nyana ni kubona seo mushimani yani na ka eza. Mi cwale ha na sa yemi, mushimani yani ayema ni yena. Ha na sikulula toho ya hae, mushimani yani asikulula toho ya hae. Añwaya mwa toho, mushimani yani ni yena añwaya mwa toho ya hae. Mafelelezo, asutelela bukaufi, ku yo bonisisa. Mi a fetuha. Mi bo mahe ne ba sweli ku mu buha, ni bo kuku a hae, ka ku komoka. Ali, “Kupalañi, ima, ki na yaale.”

⁵⁹ Kacwalo se Nili, kuli, “Ni luna, cwalo, lu bonisa sesiñwi.” Mwabona? Bupilo bwa luna bwa monyeha.

⁶⁰ Mi cwale, kambe ne lu ka pila mwa mazazi a Nuwe, ki siemba sa mañi sene luka nga? Ki siemba mañi sene luka nga mwa lizazi tuna lani la na pila ku lona Nuwe? Ne luka nga siemba sa mañi mwa mazazi a Mushe? Ki siemba mañi mwa mazazi a Elia, mupolofita, fani lifasi kaufela hane li mizizwe mwa—mwa buñata bwa—bwa lika za bunca, sina bo Jezabele ba kacenu, mi ne ba kenyzize batanga ba Mulena kaufela mwa nzila ya lifasi? Mi keleke ni baprista kaufela ne ba sweli ku mu kubamela. Kana ne mukanga siemba sa kabubo nji, kamba ne mu ka yema ni Elia?

⁶¹ Cwale, mwa mazazi a Mulena Jesu, hane lu ka nahana ka za Mutu ya sina kabubo yo, yana si ka ituta ka lifasi, nekusina likolo zene ba fumana kuli kona kwa Na keni, mi nekusina—nekusina zibo ya lituto za bumulimu. Mi—mi cwale azuha ka libizo la “kupepwa kwa mwana wa bunyazi.” Mi ki ha taha, inza kutaza

Evangeli yene shutana kwa sika kaufela sene ba lutilwe. Luli . . . Ni kunyaza bakutazi ni likopano za bona, ni zeñwi cwalo.

⁶² Mi likopano ne lipangile pulelo—pulelo—pulelo yeñwi, “Haiba mutu yomuñwi na ka utwa mupolofita wakuli yo, na ka lelekelwa kwande a sinagoge,” yeneli sibi sa—sa mwa mubili. Ne ba na ni kuikalabela. Nzila fela ye ne ba kona ku lapela kayona neli mwatasa mali a ngunyana. Neba na ni kutaha kwa sitabelo se. Mi—mi nebali bayambaeli, mi ki taba kwa butuna cwani yani.

⁶³ Mi Mutu yo na tobohile ze cwalo zani. Mi ibo Na zamaelela ni Mañolo, kono isiñi ka nzila yene ba Aziba ka yona. Ki siemba mañi sene mukanga? Mwabona? Cwale, musike. . . Bupilo bwa mina bo mupila cwale, bupaka cwale se ne mu ka eza ka nako yani, kakuli mu sa na ni moya o swana. Mwabona? Haiba munga sibaka sani cwale, ni bona, ne muka eza sani ni kale. Kakuli, ona moya o swana oli ku mina cwale noli mwa sicaba sani ni kwa kale. Mwabona?

⁶⁴ Diabulosi hana ku zwisa moya wa hae; yena ushimbulukanga fela kuzwa ku alimuñwi kukena ku yomuñwi.

⁶⁵ Mulimu ha shimbululangi Moya wa Hae, ni yena; Uzwa ku mutu alimuñwi kukena ku yomuñwi. Mwabona?

⁶⁶ Kacwalo, ona Moya o swana onoli ku Elia notile ku Elisha, Ona o swana onoli ku Joani Mukolobezi, ni babañwi cwalo.

⁶⁷ Moya o Kenile, onoli ku Kreste, notile fahalimwa balutiwa, ku shetumuka cwalo, mi usali ni fa sicaba. Mwa bona? Mulimu ha shimbululangi Moya wa Hae.

Kacwalo lu siyala fo, kuli lube ni buiketelo.

⁶⁸ Mi Ha—Ha ni boni mwahali mo ko Paulusi ha na ka inyaza ka taba kaufela, mi uli nali ya swabile fa kuba mutamiwa. Kono na sweli kuipiza iliyena kuba . . . Na lumela kuli Paulusi, sina ha na ñozi liñolo ka siñoliso sani, kuli neli Moya o Kenile ono muezisa kuli añole sani. Kuli, mwendi, nihaiba mwa busihu bwa kacenu, kuli lu kone kuhoha tuto kuzwa mwa taba ya luna, ku bonisa libaka leo Paulusi na ezelize se. Kakuli, ki za Mañolo, mi Mañolo ki a Kuyakuile. Ni lumela, kuli, inza inzi mwa tolongo ya kale ye tampakani masila cwalo, kuli Paulusi na ñolela ku mulikana hae fa, kuli, muzwale wa hae, kuli na li “mutamiwa wa Jesu Kreste.” Kacwalo, na ka li bulela ka kubona sene si mu potolohile. Cwale, nali mwa tolongo, kono sani ne si sona sa na bulela ka sona, yo—yo mutanga wa Kreste, mukutazi ni yena. Na sweli ku bulela kuli nali mutamiwa kwa Linzwi la Jesu Kreste, kakuli Kreste ki yena Linzwi.

⁶⁹ Mi Paulusi nabile munituti yo mutuna mwa lizazi la hae. Na nani takazo yetuna. Nali mu—nali mu—mu—mu mutu yana lutilwe ki, ki sicaba, mulikani wa libizo la Gamaliele, yanali muluti yomutuna wa lizazi la hae, sesiñwi sa likolo zetuna za naile ku zona zani. Ka mutala, sina ha lu ka bulela, Wheaton,

kamba Bob Jones, kamba sikolo sesiñwi sesituna sa za tumelo. Na kile alutiwa kuba—kuba—kuba mukutazi wa Linzwi. Mi na li ya itutile hahulu, mi ya butali, mi neli mushimani ya talifile ni takazo yetuna yakuli mwendi zazi leliñwi atoba muprisita cwalo kamba muprisita yomutuna kwa sicaba sa habo.

⁷⁰ Nabile ni takazo. Mi cwale afumana, kuli, ona takazo tuna ye yana lutilwe cwalo, mi nabile mwa bupilo bwa hae kaufela, mwendi kuzwa fa silimo sa bu ketalizoho ka zetalu kamba ze lishumi za kupepwa, ku yo fita ku ze mashumi amalalu kamba mashumi amalalu ka aketalizoho, ha nafelize sikolo sa koleji ni kupasa; mi nabile ni mapampili a linepo zetuna ni zeñwi kaufela, mi ayema hande ka—ka baituti kaufela ba za bumulimu, nihaiba ku muprisita yomutuna wa kwa Jerusalema. Nana ni litaelo zezwa ku yena, litaelo za butu, ze ñozwi, ni ku sepa ku Saule yomutuna yo, “Kuya kwani kwa Damaseka ku yo fumana bani kaufela kwani bene ba lapela Mulimu kushutana ni sa na bulezi, ni ku ba tama ni ku ba kenya mwa tolongo.” Haiba kwa konahala, na nani litaelo za ku ba bulaya, haiba na bata kueza cwalo. Na li . . . Na nani takazo yetuna.

⁷¹ Mi cwale, lika kaufela za na itutile, Mulimu na lizusize kaufela zona ku yena. Mwabona? Ni seo takazo ya hae neili sona, ni seo ndatahe na sinyelize masheleni a hae ku sona, ni litakazo za ndatahe ni za bo mahe, lika kaufela ne li zusizwe ku yena kakuli—kakuli Mulimu na nana ni sesiñwi fela. Kabakaleo, nali mutamiwa kuzwa kwa mulelo wa hae wa na nani mwa bupilo bwa hae, mi na tiloba mutamiwa wa Jesu Kreste, Yanali yena Linzwi.

⁷² Nzila yani ya kuya kwa Damaseka ne i cincize Paulusi. Hana ya ashetumuka, mwendi ka lebene kiloko, mwendi, mwa musihali, wa na wiselizwe fafasi. Mi utwile Linzwi, lelili, “Saule, kiñi so Ni nyandiseza?” Mi a talima mwa halimu. Mi ha nza talimile mwa halimu, kakuba Mujuda, ni kuziba kuli Siita sa Mulilo sani neli Mulena ya zamaisize bana ba Isilaele, kakuli na zibile kuli sani kona sene sili Sona.

⁷³ Muhupule, Muheberu yo nasike abiza sika kaufela kuba “Mulena,” taku yetuna ya M-u-l-e-n-a, Elohim, kwanda kuli na ikolwisize kuli sani kona mo se Si inezi, kakuli nali munituti ya lutilwe. Mi cwale hana talimile mwa halimu, mi na boni Sani, kuba Liseli, Siita sa Mulilo sene si zamaisize sicaba sa hae mwahala lihalaupa, mi ki hali, “Mulena,” Elohim, taku yetuna ya M-u-l-e-n- . . . “Mulena, Ki Wena mañi?”

⁷⁴ Mi ki ku komokisa cwani ku munituti yani, kubulela kuli, “Kina Jesu,” yena luli Kasibili yana lwanisa. Ha ki—ha ki sikuluho ni yeo! Oh! Oh! Ne i lukela kuba sesiñwi se si sabisa ka muuna yo, kuli litakazo za hae zana nani, kwa ku batisisa, ona fani fela, ya nanza nyandisa. Litakazo za hae neli muisize kwa—kwa hule kuzwa kwa taba ya luli yana talusa kuli aeze. Mi haki—

haki kuswaba ni koo mo ne ku lukela kubela, kakuli muapositola yo, fani ha Na bulela kuli, “Kina Jesu,” yena luli Kasibili yana sweli ku nyandisa. “Kiñi so Ni nyandiseza?”

⁷⁵ Pulelo yeñwi yenyinyani yelukona ku nokela mwahali mo. Mwa bona, sina mo ba sweli kusehela Keleke, bona kaniti ha ba sehi Keleke, ba sweli kuseha Jesu. “Kiñi so Ni nyandiseza?” Kana cwale Paulusi kwani, ka butali bwa hae kaufela, na lumela kuli Se nesili cwalo . . . kuli Sikwata sani sana sweli ku nyandisa nali yena Mulimu kasibili yana i papata ku sebeleza? Na sepa sani, kusina kuya mwa butungi, Na sepa luna kaufela lu lutilwe hande kwa kuziba se Ni talusa fa. Taba yeswana ya ezahala kacenu.

⁷⁶ Paulusi, ka kusa ziba, nali ya itutile mi ya butali, ka butali hahulu kufita bani Magalilea bene ba si ka ituta bana nyandisa, bani bene ba amuhezi Muuna yani Mulena ka kuishuwa. Kono, Paulusi, mwa tuto ya hae yetuna ni lituto za hae za butali, nasike a amuhela Sani. Mi ha ki sikuluho ni yeo yene lukela kuba ku yena, fa musipili wa hae. Mi a natiwa ka bubofu, kuli asike a zwelapili mwa tumo ya hae, kono na tisizwe mwa sibaka sa mukwakwa obizwa Busepahali, mi ki ndu ya yomuñwi.

⁷⁷ Mi ki ha kutaha mupolofita kwateni kwani, wa libizo la Ananiasi, yana boni pono, yena inza taha ka ku shetumuka, naboni kwana inzi, naile kwa na inzi, mi akena mwahali. Mi ali, “Muzwale Saule, Mulena na iponahalize ku wena mwa musipili ha no shetumuka; uni lumile, kuli Ni to ku beya mazoho, mi uamuhele meto a hao mi utale ka Moya o Kenile.”

⁷⁸ Mwabona kwa na inzi. Ha ki—ha ki taba ni yeo yene lukela kuba ku Paulusi! Mwabona? Kaufela zana lutilwe kueza nelitilo shutana. Mi cwale, ka—ka tuto kaufela yana nani, ne—ne itilo ba fela mbango ku yena.

⁷⁹ Cwale, na zibile kuli una ni kutwisiso. Kacwalo fa ki ye tuto yeñwi yende ya luna, kuli, kutwisiso inosi fela ha isikalikana. Ilukela kuba kutwisiso kuya ka Linzwi la Mulena. Kacwalo, yena ka kubona se, ni kuziba kuli Neli Sesiñwi sesituna, kuli, mutu yomuñwi na Si amuhezi kwa pata ahae, ki hanga myaha ye milalu ni likweli ze silezi mwani mwa—mwa lihalaupa la Arabia; ka kunga—kunga Bibebe, ka mo Ne inezi kwani, ona Testamente ya Kale, ni kuya kwani, kuyo—kuyo bapisa kutwisiso yani yana bile ni yona, ni kubona kamba Ne ili ya Mañolo.

⁸⁰ Cwale kucwani kambe naize, “Kulukile, Na sepa sani ne sili fela moya o fuka,” ni kuikela fela? “Ni ka latelela butali bwaka?”

⁸¹ Cwale, natilo ba ni kutamiwa mwa tolongo ka sesiñwi, mutamiwa. Kacwalo kasamulaho wa ku bapisa, ni kubona, ki kabakaleo ha na ñozi Buka ya Maheberu, mwa mufuta. Mwabona? Lilimo zetalu ni licika inza li kwani, ali kuina mwa Linzwi, ni kufumana kuli yena Mulimu yana mu bizize na mu kutisa kwa mulaho, ni kucinca butali bwa hae kaufela, kucinca zakile aba ni zona kamukana ka minahano, kaufela

zakile alutiwa kuba zona. Litakazo za hae kaufela, na li zusize fela kuzwa ku yena, mi aba mutamiwa. Lilato la Mulimu nelibile le li ipitezi hahulu, mi ni—ni sinulo ye cwalo, kuli asike akeluha kuzwa ku Yona.

⁸² Yani ki kutwisiso ya niti ya mulumeli wa niti kamukana ya kopani ni Mulimu. Mu—mu taha mwa swalisano ni Sesiñwi sesituna hahulu, kuli mane. . . kuli—kuli mufetuha kuba—kuba mutamiwa, kwa lika zeñwi kaufela. Mwabona? Mu—mu ikambusa kwa lika kaufela, ni kuikeza batamiwa ku Se.

⁸³ Ne ku bulezwi nako yeñwi ki Jesu kuli, “Mubuso wa Lihalimu uswana sina mutu yana lekile macwe a butokwa. Kono cwale ha sa fumani Licwe la butokwa lani, ulekisa kaufela zana bile ni zona, kuli aikungele Lani.”

⁸⁴ Mi yani kona nzila yeliteni ni cwale. Muna—muna ni kutwisiso ya butali, muna ni—ni—ni kutwisiso ya lituto za bumulimu; kono ha litaha kwa nako ya kuli mina—mina—mina mufumane Sika sa luli, muka—muka tokolomoha fela lika zeñwi kaufela, mi muikwalela kwa sika Se.

⁸⁵ Paulusi na zibile kuli ku cwalo. Na—na fumani kuli na kumalezi ku Sesiñwi. Sina ha lu beyanga yona—yona—yona mbongolo mwa tamaiso, ki ku—ki kuhoha sesiñwi. Mi Paulusi na zibile, kasumulaho wa kutwisiso ye, mi lilimo zetalu ni licika za kubapisa lika—lika za kutwisiso yana nani, ka Bibebe, a lemuha kuli Mulimu na mu ketile mi na mu zamaisa ka Moya o Kenile, kutwisiso yana bile ni yona, kuhoha Evangeli fa pila Bamacaba. Ona Moya, Kasibili, no mubusa.

⁸⁶ Mi, kacenu, kakuba batanga ba Krete, lu ba baba busiwa, kuswaseha. Halukoni kuya. Lu kiyezwi mwahali ka Zona, ku hapiwa kwa Linzwi. Hakuna taba ka sa bulela mutu kaufela, mu hapilwe ku Lona. Kuna ni sesiñwi ka Lona, kuli mane hamukoni kuba kwahule ni Lona. Mu beilwe mwa koko iliñwi ni Lona, ka Moya o Kenile, umibeile kwa koko ya Linzwi. Hakuna taba ka sa bulela mutu kaufela, Ki lona Linzwi. Sani kona se si hapanga lika ku Lona, kubeiwa mwa koko ni Lona. Kwa Linzwi, ka Moya, na hapilwe.

⁸⁷ Na itutile kwa—kwa mulaho wa lilundu la Arabia kwani. Fani, lika za hae kaufela za kale, ni kutwisiso, ni takazo, kuli, na tubuzwi lika zani.

⁸⁸ Cwale, kwani kona ko lu fumana, kacenu, kuli lu lukela ku tubuliwa, pili. Mi batu ha ba lati ku tubuliwa. Muzwale wa Methodist ubata kuswalelela nyana kwa lituto za hae za Methodist. Uh-huh. Muzwale wa Baptist ubata kuswalelela kwa lituto nyana za hae za Baptist. Mwabona? Kono mu lukela ku tubuliwa hande nde kwa lika kaufela, mi kipeto mupepwe fela sinca, hape. Mi mukalile fani, mutuhele Moya o Kenile uetelele. Hamukoni kubulela kuli, “Kulukile, cwale, bo—bo ndate babulezi kuli, hane ba kena mwahali, ne bakeni mwa

keleke, ne ba itumelisize mazoho ni bo mulisana. Bona, ki ma membala ba likute babande.” Sani si lukela kuba sesinde kwa lusika lwa bona, kono luna lu lusika lusili. Mwabona? Cwale lu lukela ku kutela kwa linako za Bible za lizazi le.

⁸⁹ Baprista neba hapilwe, ni bona. Kono, mwa bona, ne ba tile mwa nako ya kalulo yeñwi, mi neba—neba palelwa kutubula ku hapiwa kwa bona kwa kale mi ba apale ku hapiwa koku nca.

⁹⁰ Mi taba yeswana lwa ifumana kacenu. Lu se lufitile mwa linako za tutengo twa likopano, sina hane lufitile mwa linako za likeleke, Bible, ni zeñwi cwalo, kono cwale lutile mwa lusika lo lu lukuluhile, ko Moya o Kenile Kasibili utaha mi u to paka Iliona, ni ku Itibahaza ona kasibili, upanga sepiso kaufela ya Na sepisize, kuli ipetahale. Oh, mawi! Ha ki nako kwa butuna ni yeo!

⁹¹ Mi na zibile zani, taba yeñwi, na zibile kuli nasike kuya ka libaka. Za kuli, a hapiwe ku Se, kuli asike aba. . . sana ezize, kono na—na bata ku ya. Na zibile kuli takazo ya hae ne imutisa mwahala bana bahabo kwa na memilwe kutaha, mi ibo na hapelezwa mwa Moya kuli aeze sesiñwi fela. Na si anosi.

⁹² Mwendi yomuñwi ukona kubulela kuli, “Muzwale Saule, Muzwale Paulusi, lu bata kuli utahе kwanu, kakuli luna ni keleke yetuna kufitisisa. Luna ni puteho yetuna kufitisisa. Lineo za hao likaba zetuna, ni zeñwi cwalo.”

⁹³ Kono kakuba yana hapelezwa mwa Moya, a hupula kuli, “Ni na ni muzwale kwani. Ni lakaza kuya teni mi ni puluse muzwale yo, ku mu tisa ku Mulena.” Kono, niteni, Moya wa mu hapeleza kuya kwa sibaka sisili fela. Nali mutamiwa. Luli.

⁹⁴ O Mulimu, aku lueze batamiwa sina cwalo, kuzwa kwa litakazo zaluna za buitati, ni kwa likatulo za luna bañi ni nzila yende ya kunahana kwa luna, kuba mutamiwa wa Jesu Kreste. Na sepa yani neli pulelo yetuna, kuli, “Ni mutamiwa ku Jesu Kreste.”

⁹⁵ Mi muhupule, Yena ki yena Linzwi. Mwabona? Hakuna taba ka seo mutu kaufela anahana, ki Linzwi. Mwabona? Haiba u mutamiwa kwa Linzwi, hakuna kopano ye ka ku kelusa kuzwa ku Zani. Ki—ki Linzwi. Wena u. . . U mutamiwa ku Lona, ku felile. U lukela kuezа ka nzila ye Li eza ka yona.

⁹⁶ Cwale, yena nasike aya kwa libaka zeñwi za na ka lakaza, kakuli (kiñi?) Moya no mu hanisize. Mwa hupula, linako zeñata, zeo Paulusi nalika kuya kwa libaka zeñwi, ka kunahana, “Kwani kona kone Ni kaba ni mukopano o mutuna,” kono Moya no muhanisa. Cwale, kana sani sa bonisa ni kupaka hande kuli Paulusi nali mutamiwa? [Puteho ili, “Amen.”—Mu.] Mutamiwa ku Jesu Kreste, ku hapiwa kwa Linzwi la Hae, ka Moya! Oh! Na lata sani. Uh-huh.

⁹⁷ Na li ya tamilwe. Na tamilwe ka mawenge, ni ka mihala ya lilato, kuli aeze tato ya Mulimu, mi yani fela. Nali mutamiwa. Nali mwa litamo za lilato. Nali mwa koko ni Kreste. Na si ke aikenya mwa koko ni sika sisili fela. Nakeni mwa koko ni Yena. Mi kaufela kone kuya Tamaiso, kona kwana nza yanga. Hakuna taba kamba mafulo neli amatala cwani, kwanu kwa neku *le* kamba neku *lani*, nanza yanga ka nzila ya Mueteleli ni koko ko ne iyanga.

⁹⁸ Oh, busihu bwa kacenu, haiba luna, kakuba ba Branham Tabernacle, lukona kuba batamiwa; kwa buitati bwa pupo yaluna bañi, kwa litakazo zaluna bañi, kuli lukone kuipa luna bañi ka kufelelela mi lube mwa koko ni Yena, hakuna taba ka seo babañwi ba lifasi ba nahana, seo babañwi ba lifasi baeza. Lu beilwe mwa koko ya litamo za lilato. Lu batamiwa. “Mahutu aka akeni kwa koko ni Kreste, hana kubina. Meto aka akeni kwa koko ku Kreste, kufitela Ni, ha Ni bona mahule baba mapunu ba kacenu mwa mikwakwa, La sikulula toho yaka. Yaka—yaka pilu yaka ikeni mwa koko ya lilato ku Yena, kufitela ha Ni saba mwa lilato la lifasi le, ni hanyinyani. Tato yaka imwa koko iliñwi ni Yena, kufitela mane Ni tokwa kuziba nihaiba seo litakazo zaka lili zona. Fela, ‘Kaufela ko Uni isa, Ni ka latelela, Mulena.’ Ni ka ba mutamiwa.” Mwabona?

⁹⁹ Paulusi nali mutamiwa wa luli. Yena na sa buleli litaba ze fosahalile. Na lutilwe ka Moya o Kenile, hape, ku libelela fa Linzwi. Cwale, na lutilwe ka nzila iliñwi, kono—kono Mulimu na mu lutile ka nzila isili cwale. Na lutilwe ka Moya o Kenile ku no libelela ku Mulena, hakuna taba kamba litakazo za hae nelili cwani.

¹⁰⁰ Cwale Ni ka ba ni, ka tuso ya Moya o Kenile, ni mi bonise sika. Mwabona? Cwale ha lu ngeni ka mutala.

¹⁰¹ Zazi leliñwi, Paulusi ni Silasi, hane basweli kushetumuka mwa nzila ya muleneñi omuñwi kone ba na ni ancafazo. Mi musizana yomunyinyani, yana taselizwe ki madimona nasweli ku mu latelela, inza huwa mwa mulaho wa hae. Mi hakuna kukakanya kono Paulusi nazibile kuli una ni bundume, kakuba muapositola, bwa ku omanya moya o maswe wani kuzwa ku musali yani. Kono kana mu lemuhile? Na libelezi, zazi ni zazi, kufitela, hañihañi fela, Moya o Kenile wa bulela ku yena, kuli, “Ye kona hola.”

¹⁰² Mi ki hali, “Wena moya, zwa ku yena.” Mwabona? Na zibile ku libelela ku Mulena.

¹⁰³ Mi fani kona fo batu babañata kacenu batisanga maswabisa kwa Linzwi. Baya kwande ni takazo. Ki lincafazo zekai ze siilwe fela bakeñisa taba ye cwalo, kakuli mubuleli halibelangi ku bona seo Mulena una ni ku bulela! Babañwi ba ku bona bali, “Taha kwanu,” mi baka—baka ya ona fo kakuli ba—ba katengo babulezi kuli, “Zamaya.” Mi Moya o Kenile uka bulela taba ye

shutana. Ibo, takazo ya mutu kikuli abe muokameli yomutuna wa puteho, kamba—kamba sesiñwi cwalo, kamba yomuhulu yomuñwi, kamba bishopu cwalo, kamba sesiñwi sika muhoha, “U lukela kuya.” Mi, ibo, wa ziba hande. Moya o Kenile ubulela kuli, “Uye *kafa*.” Mwabona? Yena u tamehile kwa kopano ya hae. Yena ki mutamiwa kwa kopano.

¹⁰⁴ Kono haiba utamehile ku Kreste, u etelelwa ka Moya o Kenile. Yani . . . ? . . . Mwabona? Yena, ubeilwe kwa koko, ki mutamiwa. Hasipangi shutano ka seo mutu kaufela uka bulela; ki—ki—ki—mulangu olila ni ngongi ya mulumo omutuna. Yena uutwanga fela Muhuwo wa Mulimu, mi wa bulela ha Li taha. Hakuna sika saka bulela.

¹⁰⁵ Yomuñwi ukali, “Oh, oh, Muzwale Jones!” Muzwale Roberts, kamba yomuñwi, baana babatuna ba mwa naha yaluna kacenu, sina Tommy Hicks, kamba—kamba—kamba Oral Roberts, kamba—kamba Muzwale Tommy Osborn, babañwi ba babuleli babatuna bani. Haiba yomuñwi uka bulela, “Kuli, utahе kwanu, Tommy. Wena u muuna wa Mulimu yomutuna.” (Kamba Oral.) “Mi Ni—Ni na ni—ni malume ya lobezi kwanu, ya—ya katazeha luli. Mi wa—wa kula. Ni bata kuli utahе kwanu. Na sepa una ni mata aku mufolisa.” Mwabona?

 Mi mwendi Moya o Kenile uka bulela ku yena, “Isiñi cwale.”

¹⁰⁶ Kono, ibo, kwa bulikani bwa muuna yani, yena utamehile kuli aye ku yena. Haiba hana kuya, ukaba sila ku mutu yani. Muuna yani ukali, “Kulukile, naile kwa *kuli-ni-kuli*, ku yo folisa mwana yani kamba mushimani yani. Na ziba na ezize cwalo. Mi Ni bile mulikana hae, fa lilimo, mwabona, mi na sika taha kwa sibaka saka.”

¹⁰⁷ Kono haiba u hapelezwa ka Moya o Kenile kuli aye, ku hande asike aya, haiba utamehile ku Mulimu. Mulikana hae, ya lata. Kono ku hande a zamaiswe ki Moya o Kenile kuya kwani, kakuli hakuna bunde bobu kaba teni, nihakuli cwalo. Ni fitile mwa lika zani linako zeñata.

¹⁰⁸ Kono Paulusi na libelezi fela kwa Moya kuli umu bulelele sa kueza. “Mulibelelange Moya,” a bulela. Na yemi busihu bo buñwi, inza kutaza. Mi ki haya kwani. Na boni muuna yana li sihole. Mi ona fani fela, Moya wa bulela ku yena, mi ki hali, “Na bona . . .” Kuli cwani? Ka mukwa o swana wana lemuhile ka ona mo ne ba ka yobela ni kozi, fa sooli. Mwabona? “Na bona kuli una ni tumelo yakuli ufole. Aku yeme. Jesu Kreste uku folisize.” Mwabona? Ki fohe cwale. Yena—yena nali . . . Na li mwa koko. Na ka kona kuba ni ancafazo mwa sunda mi nekusina sene si ezahalile, kono ni teni na libelezi kwa Moya o Kenile kuli ubulele. Mwabona? Na li mwa koko ya kupo yani.

¹⁰⁹ Cwale mu bulela kuli, “Muzwale Branham, unyaza so no bulezi la Sunda, ka za kuli nosweli ku libelela nako ye kaufela.”

110 Mi, kono, mwa hupula, neli Moya o Kenile ono bulezi kuna fa mukwakwa, mi wali, “Na kuluma ku kutela kwa bakuli ni ku baba nyandile.” Mwabona? Ki ku utwela kwa Moya o Kenile. Luli. Ne ni sika ya konji ha Na ni bulelezi kuli nieze cwalo. Ne ni sweli ku libelela KISONA SA BULELA MULENA, kufitela ha Ni ba ni KISONA SA BULELA MULENA. Cwale, sani sa shutana. Mwabona? Cwale, Sani, Si panga shutano. Eeni.

111 Na libelezi Linzwi la Mulena. Na katalizwe mwa Moya, kueza fela sana bata Mulimu, mi sa ba mutamiwa wa Jesu Kreste. Balikani, haiba lukona fela kuba batamiwa!

112 Na ziba kwa cisa. Kono Ni—Ni bata ku bulela fa batu babañwi hape, haiba mutabela. Nina ni baba silezi kamba ba ketalizoho ka babalalu baba ñozwi fa. Kono Ni—Ni tabela kuli ni bulele libizo la yomuñwi fela kamba bababeli.

113 Halungeni mufuta wa Mushe. Na pepilwe ali mulamuleli. Mi na—na—na zibile cwalo, kuli na pepilwe ali mulamuleli.

114 Kono Ni sika bulela kale ka Mushe, Ni bata kubulela cwana, kuli, Mulimu kamita una ni kunga mutu kaufela, yaka Mu sebeleza ka niti, ku ba mutamiwa wa Hae. Mutu yani una ni ku itoboha litakazo kaufela za nani, lika kamukana zali zona, sika—sika kaufela, bupilo bwa hae, moyo, mubili, tato, litakazo, ni lika zeñwi kaufela, mi abe mutamiwa, yatezi ku Kreste, Yali yena Linzwi, kuli asebeleze Mulimu.

115 Mwakona ku swabela ku zamaya ka ku shutana ni likatulo zamina zende. Mwendu, mwa katengo kakañwi, wa kona ku nahana kuli baka ku nanula ku kufa sesiñwi sesituna, kuli uikuhumuse. Kono ki sikamañi so ipumana kuba sona? Uipumana kuli ukomilwe, hasamulaho nyana, kufitela Mulimu afumana mutu ya itakaleza kuba mutamiwa ku Yena.

116 Mulimu ubata batamiwa. Kona mwa ezezanga kamita. Mwa kona ku batisisa mwa Mañolo. Mutu una ni kuba mutamiwa ku Kreste, kulwanisa sika kaufela. Kabakaleo, hamukoni ku tamahana kwa sika kaufela konji Kreste; neba bo ndataho, bo maho, muzwale wa hao, kezela hao, muuna hao, musala hao, mutu kaufela. Mina mu tamahana fela ni Kreste, mi Yena fela anosi, fohe kipeto Mulimu uka itusisa mina. Hakusi cwalo, hamukoni.

117 Kuzwela kwande, fokuñwi ku yo nyemisa batu. Mwabona? Ni—Ni lika ku mi tamulula ku zani. Mu lukela kuba ni sibaka sa makalelo, sina fokuñwi kubiza basali baba kuta milili ya bona ni kutina liapalo ze, ni kuipala ka pulelo yakuli ki Bakreste. Muli, “Yani ki nto ye nyinyani.” Kihande, mulukela kukalela kokuñwi. Kacwalo mukalele ona fani, ni ABC yamina. Mwabona? Mi mupumake kwateni mibonahalelo ya lifasi, niteni, mi mube mutamiwa ku Kreste. Mi kipeto muzwele fela pili, mupumake lika kaufela, kufitela sikwenda sa mafelelezo si tamuluha.

Fohe kipeto—kipeto. . . Muba mutamiwa cwale. Muka ba mwa tamaiso ya Hae. Yena, Una ni mina mwatasa tamaiso ya Hae.

¹¹⁸ Cwale, Mushe na zibile kuli na pepilwe ali mulamuleli. Na zibile cwalo. Mi kana mulemuhile, ka takazo yana nani Mushe; ka kuziba kuli bo mahe neba mu bulelezi kwani, haibile ki yena yana mu uta.

¹¹⁹ Hakuna kukakanya, fani Mushe mbututu yomunyinyani hana pepilwe, kuli bo mahe ne baize, “Wa ziba, Mushe, fani. . . Bo ndataho, bo Amuramu, ni Na ne lu lapelanga ka tundamo. Ne luziba, ni kubona mwa Linzwi, neli nako ya kutaha kwa mulamuleli. Mi se lu lapela, ‘Mulena Mulimu, lubata kubona mulamuleli yani.’ Busihu bulibuñwi, Mulena ki ha lu buleleli, mwa pono, kuli uka pepwa, mi ki wena yana kaba mulamuleli. Ne lu sa sabi taelo ya mulena. Ne lu sa bilaeli ka sa na bulezi mulena. Kuzwa fani, ki ha se luziba kuli wena no pepilwe uli mulamuleli. Cwale, Mushe, ne luziba kuli ne lusike lwa ku hulisa hande.”

¹²⁰ Cwale muhupule, nebali kwatasi kwani, myaha ye mianda yemine mwa Egepita. Mwabona?

¹²¹ “Mi ne—ne lu bata ku kungela sika—sika sesinde, mufuta wa tuto ye swanela, kulutiwa ko kunde. Kacwalo, Ne ni kungile ni ku kubeya mwa areka ye nyinyani, ni kukuisa mwa nuka ya Nile. Mi neli taba yenca, mi mandinda akukisa areka nyana yani mwahala bucwani bwa nuka ni mataka, ni kuiisa hande ka swanelo, limaele kwahule, ni kuyo ikenya mwa lapa la Faro, ili koo. . . ne kuinzi mwana musizana wa Faro, kone kuna ni sibaka sa hae sa kutapela. Mane ni kamo kuli—kuli Ne ni ziba kuli na ka tokwa musali wa ku kuuta wena.”

¹²² Mi mwa mazazi ani, ka niti, ne ba sina mabotela akunwisa limbututu cwalo, kacwalo nana ni kuba ni—ni mubabaleli ya anyisa. Kacwalo. . .

¹²³ “Mi, Miriame, Na muluma kwani. Mi sa yema fani, mi ali, ‘Na ziba ko Ni kona ku fumana mubabaleli ya anyisa,’ mi ataha kuto ni biza. Mi, Mushe, likwalo kaufela likwalilwe. Mulatiwa, se una ni lilimo ze lishumi ka ze silezi za kupepwa cwale, mi ukaba mwana Faro. Mi zazi leliñwi ukaba mulamuleli yaka lukulula sicaba kuzwa mo.”

¹²⁴ Milelo ya Mushe ya kala kuhula. “Ni ka balisisa, ima. Ni ka balisisa lika kaufela ze Ni kona. Mwa ziba se Ni kaeza? Ni ka balisisa mwa kubela mutu wa busole, mi Ni ka ziba mwa ku lamulela sicaba se kuzwa kwanu. Ni ka ba nduna yomutuna, bishopu, kacwalo Ni ka ziba mo li ezezwa. Mi Ni ka—Ni ka ba lamulela. Ni ka ikungela Ph.D yaka kamba LL. Ni ka eza cwalo.”

¹²⁵ Sina “Father Chiniquy,” haiba mukile mwa bala libuka za hae. Ku lukile. Yena “uka lamulela Baipanguli kaufela,” mwa ziba, mi ki haba ya cwalo, yena kasibili. Kacwalo, muprisita yomutuna yo, lilimo ze fitile, “Father Chiniquy,” mulukela

kufumana buka ya hae ni kuibala. Ba mu biza kuli, “ndate.” Kono yena ki Muzwale Chiniquy fela, seo nali sona. Luna halu lukeli kubiza mutu kaufela kuli “ndate,” sina cwalo. Kacwalo lu fumana kuli—kuli luna. . . Na ya kwa kubala Bibebe, kacwalo naile kwani ni ku yo lwanisa bulapeli bwa Baipanguli ni ku bueza kuba bwa Katolika fela. Mi hanatile kwa kubala Bibebe, Moya o Kenile wa taha fahalimwa hae, mi aamuhela Moya o Kenile, mi kasamulaho—kasamulaho aba alimuñwi wa bona.

¹²⁶ Kacwalo he mulemuhe se, kuli Mushe na fumani tuto ka kutala. Kakuli, yena—yena na zibile. Nali ya butali luli, yaituile hahulu, wa ngana luli! Kufitela, hakuna ni yomukana. . . Yena mane na kona nihaiba kuluta Maegepita. Kufitela, na kona kuluta lituto za zibo yabona. Na kona kuluta—kuluta manduna bona seo mata a busole nali ona. Nali muuna yomutuna. Mi batu ne ba saba Mushe, bakeñisa butuna bwa hae. Oh, muniti ya cwalo yani! Mawi! Nali bishopu yomutuna, kamba mane inge popu. Nali muuna yomutuna. Mi nali muuna ya—ya—ya mata. Mi na zibile kuli na pepezwi kueza ona cwalo, mi na lutilwe, ka litakazo zetuna, kuli aeze cwalo.

¹²⁷ Sina fela kacenu. Hani buleli kuli, kulutiwa mwa likolo, Ha ni buleli cwalo. . . Sina habali kwanu kwa Wiko cwale, baka yaha sikolo se si feza madollar aeza ma milioni a handeleti-ni-mashumi-aketalizoho kuba sikolo sa za bumulimu, mwabona, Mapentekota, ki—ki sikolo sa madollar aeza ma milioni a handeleti-ni-mashumi-aketalizoho. Ku na, yani ulukela kuba mubuleli mwa simu. Mwabona? Mwabona? Mwabona? Kono, seo kaufela, ki sikamañi se ba eza kwande kwani? Ki sikamañi se ba li sona? Sishañata sa ma Ricky. Ona cwalo fela. Mi cwalo kona mo ba zwezi. Kubile cwalo kamita, babañwi ba kubona kaufela, mi wani ki muinelo oswana. Mwabona?

¹²⁸ Cwale lu fumana cwana, kuli, fani, Mushe, mwa lituto za hae kaufela, mi kacenu, ka lituto kaufela, kupanga mabishopu ba batuna ni zeñwi cwalo, takazo yetuna, ye pahami, ki sikamañi se luka eza? Litakazo zaluna liba fela sina mo ne libezi za Mushe. Mwabona?

¹²⁹ Mulimu, fani Ha si ka nga kale mutu mwa lizoho la Hae, Na nani ku mu tubula litakazo za hae. Na nani ku mu tubula kuzwa kwa lituto za hae kamukana.

¹³⁰ Na ile kwande, mi sa ba lukulula; na bulaile Muegepita alimuñwi. Mi yena, mi hana ezize cwalo, na fumani kuli nali mwa mafosisa. Na sa koni kueza sani. Ne si ka nzila yani. Mi Mulimu nabile ni kumuisa kwande mwa lihalaupa, kuya mwa lihalaupa, sibaka sa lihalaupa.

¹³¹ Muka lemuha, mufuta o munca cwalo, kamo mitangana ye, kuli Mulimu ha na ni liñusa la bona. Ubaisanga mwa lihalaupa.

¹³² Na isize Paulusi kwa lihalaupa, kwa ku muluta, ku mubulelela seo pono tuna ye neili yona, kwande mwa lihalaupa.

“Kuya kwande kwa sibaka sesiñwi.” Mi ki ha ina kwani kufitela Mulimu azibahaza ka kutala sa na kaeza.

¹³³ Mi nako ya Mushe, Na mu isize kwande mwa lihalaupa. Amu inisa kwande kwani ka myaha ye mashumi amane, ni ku mutubula kuzwa kwa lituto za hae za bumulimu ni litakazo. Oh, ki nako ye cwani yani, kuli na talimile kwa mulaho ni kubona mapalelwi a hae. Ni kamo kuli luna, busihu bwa kacenu, lu lukela kueza taba yeswana, ki ha lubona litakazo za luna.

¹³⁴ Mutalime kwa mikopano ya ku foliswa, mi mubone haiba Mulena akile aeza sesiñwi mwa myaha yefitile, ili kukala ku kutiseza foliso kwa bakuli, ni zeñwi cwalo.

¹³⁵ Mutu ni mutu, kopano kaufela, kakuli Ne isika taha mwa kopano ya bona, neba na ni ku ba fumanela mufolisi. Mi ki sikamañi se lu ezize? Halu talimeñi fateni fa nako nyana fela. Lu ezize taba yeswana yeo Mushe na ezize. Ne luzwezi kwande mi lwa lika ku ipangela makazo ya mufuta omuñwi. “Ni akalelize butuku. Ni—Ni—Ni nani mali mwa lizoho laka,” ni kupanga makazo. Mwabona? Mi ki sikamañi se lu nani? Baana babañwi baba cwalo mwahala kubilaela koku cwalo, baba filikani ni kuba macakolwa ba kamita, ku ikalelwa, mi bana ni mihupulo ya bona. Mi ba kutezi kwa mulaho kwani, muzamao ozwa kwa mulelo wa mapentekota, ukutezi kwa kupanga likopano ni lika zeñwi hape. Mwabona?

¹³⁶ Ki sikamañi selu ezize? Lu bulaile Muegepita alimuñwi. Yani ki niti. Mi lu likile. Lu ikatalize. Lu lifile. Lu belekile, luse lukeni mwa mikopano ya litapelo za busihu kaufela, kufitela lusilelwa ki manzwi. Mi—mi lulikile kupanga sika sesiñwi, ni ku waba—wabisa sesiñwi, ni lika zeñwi ze kaufela, ni kufumana kuli za palelwa. Lu tokwa kukutela kwa lihalaupa. Luli. Eeni, sha. Kutundana ni kuikataza. Kiñi fela ha lu sa ituleli? Sani kona se mu lukela kueza, mwabona, mukute mi muitobohe. Kiñi, lu ezize lika zeswana zene ba ezize, taba yeswana yana ezize Mushe. Hakuna bunde ni bobukana. Kasamulaho wa lilimo ze mashumi amane, naipumani ali mutamiwa kwa Linzwi la Mulimu. Luna ki sikamañi se lu lika kueza?

¹³⁷ Fani, hane kutile Mbuyoti yetuna, ni ponahazo ya lika zetuna ze kaufela zeo Mulimu alu bulelezi ka zona: kamo lu lukela kubela baba pepilwe sinca; ni kamo lu lukela kuamuhela Moya o Kenile; ona kolobezo ka Libizo la Jesu Kreste; ni lika ze mo kamukana.

¹³⁸ Mwa bona, sicaba, mwa sibaka sa kuina mwa Linzwi lani, kuswaseha ku Lona, ki sikamañi se ba eza? Ne ba kalile ka tuto ya kopano ya bona bañi, yene se ipalezwi kale, ni kulika kupanga sika sesi bonahala inge Niti.

¹³⁹ Ki hande ni yemele ona fani. Mwabona? Na sepa mu nani butali fakuli muzibe se Ni talusa. Mwabona? Kono, kiñi, mutalime se si ezahalile. Munahane ka zona.

140 Ki sikamañi se lu nani, busihu bo? kwanda fela—fela—fela naha yetezi batu. . . baba ikopanyize kuba baba latula Mañolo a Mulimu; bona baba ka biza ona—ona—ona Bupilo bwa Moya o Kenile, kuli, “Neli fela—fela kubala mihupulo ya batu”; bene baka hana taba yecwalo kuli ikene mwa keleke ya bona; mi ne basike ba mi lumeleza kuli mubulele Linzwi lililiñwi kaza peu ya noha, kusilelezwa kwa Kuyakuile, ni lika zeo Moya o Kenile u patuluzi ni kupaka kuba Linzwi. Ni ikatalize mwa mulaho a kuikataza kaufela, kuli lito pakiwa kuna kuli li fosahalile.

141 Ki sikamañi se ba nani? Taba yeswana yana nani yona Luther, babañwi ba kubona, mwabona, ku bulaya Muegepita. Ki sikamañi. . . Neli sikamañi sani? Mwendi na ezize kuli mutu yomuñwi akale. . . kutuhela kuuzwa, kamba mwendi kupila sina ya sepahala ku musala hae. Kono ki sikamañi so no mu zwiselize ku zani? Ali membala wa keleke. “Taha uto ikopanya kwa sikwata sa luna.” Mwabona?

142 Muuna ya nunka ku bola yani sika fela sana ka supa minwana ku sona, sa kupunyuha kwa hae, ka myaha ye mashumi amane ya lituto za hae; Muegepita ya nunka ali kulobala mwani, ya bolile mi ushwile.

143 Cwalo kona mo ku inezi ni busihu bwa kacenu. Taba inosi fela yelukona kusupa ku yona, kwa ancafazo ye ezahalile ye (kamo ibizezwa), ki sishañata se si nunka sa mamembala ba keleke baba sa zibi ka za Mulimu sina Mbonezikai mwa sa zibeli ka busihu bwa Egepita. Kulukile. Haili, kaza ku ba bulelela Linzwi la Mulimu, bona bali, “Ha ni lumeli Sani.” Bali, “Hanina taba ka so bulelela, Na hani lumeli Sani.” Mwabona? Mwabona? Yani ki nto ye maswe ya ku supa teni ku yona, ka kuikataza kaufela ni ku tukufalelwa kaufela ko lu nani.

144 Mwendi lwa kona kusupa kwa sikolo sesituna, kono li shwile. Ne lu ka supa kwa kopano yetuna, kono ki ye shwile. Ki ze nunka. Kuswana fela sina taba yapili yene lu sa zo feza yani. “Sina kulube kukutela mwa silezi, ni nja kukutela kwa mataza a yona,” haluka kuta. Muegepita alimuñwi ya shwile.

145 Hakuna kukakanya kono yomuñwi naize kuli, “Mushe, ki hande, ki kuli hauna makeke ka sicaba se nji? No bizizwe kuli ueze taba ye.” Yomuñwi yana ziba Mushe, mi na ziba kuli na bizizwe ka taba yani. “Mi ki kuli. . . Ulatehezwi ki maikuto a sicaba nji?”

“Batili, sha.”

146 “Kulukile, kiñi hausiyo kwande, kwani, unzo eza se? Mi kiñi hausiyo kwanu, unzo lika kueza se? Mi ki kabakalañi ha usayi ni babañwi baba siyezi ba bona?”

147 Mushe nali kwande kwani inza tubuzwi, kufitela hana tiloba ni kutwisiso fa sicacani se situka mulilo, sani ne sitilo bulelela Linzwi. “KI NA Mulimu wa Abrahamama, Isaka, Jakobo. Mi Ni

hupuzi sepiso ya Ka. Mi Ni tile kuli ni to ba lamulela. Na ku luma kuli u yoeza cwalo.” Sani neli sona.

148 Na boni Linzwi, isiñi lizwalo la sicaba kamba litakazo za sicaba. Kutuha fani nabile sikamañi? Na sa tabeli ku kopana ni Maegepita ni hanyinyani. Na sa tabeli ku kopana ni taba ye ni hanyinyani. Kono na tiloba mutamiwa. Amen. Lilimo ze mashumi amane za fita, inza tubuzwi, kono natiloba mutamiwa, fa sicacani se situka, Mushe yomutuna ni zibo ya hae kaufela. Bibebe ibulezi kuli Mushe nali muuna ya mata mwa manzwi ni mwa likezo, kwani kwa Egepita.

149 Kono ha mu talime sana ezize muniti yomutuna fa Pila sicacani se situka. Yena na bulezi fela kaza kutokwa mata kwa hae. Fani hana boni mulelo wa luli wa Mulimu, na ipulezi kuli na sina mata a ku kona kueza sani. Kanti, na lutilwe mwa lituto za bumulimu kaufela zene ba kona kumufa, ku lutiwa mwa sikolo sa bona sesinde kufitisisa. Kono, ibo, ki sikamañi sana ka eza haiba kambe. . . Siita sa Mulilo sani ne si lepelela kwani mwa sicacani? Naize, “Na mane hanikoni nihaiba kubulela ku Yena. Mulena, ki Na mañi, kuli Ni zamaye?” Mwabona?

150 “Tubula likatulo za hao, Mushe. Ni bata ku ambola ku wena. I tubule ili wena, ni zona likatulo za hao cwalo. Se—se uli fafasi hape. Ni bata ku ambola ku wena.”

151 Mane na sa koni nihaiba ku bulela. Mafelelezo, mutamiwa ya ketilwe, mupolofita ya ketilwe, sina fela mwana ketezwi Paulusi. Mushe na ketilwe, kuba mulamuleli. Mi cwale, mafelelezo, Mulimu na tiloba ni mutamiwa wa Hae ya ketilwe ku Yena. Oh, haleluya! Na zamaya fela kuya ka mo Linzwi la Mulimu ne li mu zamaiseza. “Ki mañi ye Ni kali uni lumile?”

“KI NA.”

“Kana Ni ka eza cwani?”

“Ni ka ba ni wena.”

152 “Eeni, Mulena, ona cwalo fela Mo bulelezi. Ki Na yo.” Oh, mawi! Yani, ki mutamiwa.

153 Uya ka ku lwanisana ni minahano ya hae ye i ketile. Cwale, na lutilwe mwa kufela litaelo kwa mpi. “Mikwale, mwa halimu! Kusupa fa pata!” Na lutilwe mwa ku zamaela, “Makoloi, kaufela neli mwa swanelo! Masho, kwapili! Ku laela!” Cwalo kona mwa ka yo hapela. Yani neli tuto ya hae.

Kono naize, “Ki sikamañi se Ni ka itusisa?”

Ali, “Kiñi so nani mwa lizoho la hao?”

154 “Ki kota.” Mulimu uezanga lika ze bonahala bukuba fokuñwi, kwa muhupulo wa mutu. Mwabona? Na nani kota mwa lizoho la hae. Ni milelu inze i lepelela. Lilimo ze eite za kupepwa. Musala hae inza pahami fa mule; mwana hae inza inzi fa noka. Mazoho, amanyinyani abunolo inza lepelela; ni kota. Na nanuzi

toho ya hae mwa halimu, kakuli nabile ni KISONA SA BULELA MULENA. Kiñi? Na tiloba ya swasizwe kwa mafelelezo.

155 Nali mutamiwa. “Ni ka zamaya fela haiba Linzwi la ni shenyisa. Ni ka bulela fela fo libulezi Linzwi.”

“Kana uya kai?”

156 “Ni na ni tumo iliñwi: yoyema fapila Faro mi u mu bonise, ka kota yona ye, kuli Mulimu uni lumile.” Amen.

“Ki sikamañi so ka eza kasamulaho wa fani?”

“Uka lukisa lika ze tatama, hasamulaho Ni mano eza se.”

157 Ki fohe cwale. Una ni fela taba iliñwi ya kueza, muhato wa pili, busihu bwa kacenu: kuipeya, akube mutamiwa. Usike wa ikunga kuli u sesiñwi. Akube mutamiwa.

158 Mushe na tiloba mutamiwa, nabulezi kuli mane nihaiba kubulela na sa koni. Mafelelezo, fani Mulimu hana musweli mwa lizoho la Hae, kakuli nakonile fela kuya ko Mulimu na mu isa. Kona, kwa Na mubulelezi Linzwi. Na zibile kuli neli Linzwi, mi kiha ipa ili yena kwa Linzwi. Mi Moya o Kenile kwani, Mulimu, aswala Mushe kwa tato ya Mulimu.

159 Yani kona taba ya Na ezize ku Paulusi. Ki niti yeo nji? [Puteho ili, “Amen.”—Mu.] Na swasizwe Paulusi; Mujuda, yomunyinyani, wa ngo ye shengile ya filikanya, oh, ni Ph.D. ni ma LL.D. neli ñozwi ku yena kaufela. Kono Na ize, “Ni ka mu bonisa sa ka fita kusona bakeñisa Linzwi.” Mwabona? Mi ni yena . . .

160 Mi cwale Paulusi hana inzi fani mi inza bona Linzwi, ni kubona kuli yani nali Jesu, mi ki ha nanula mazoho a hae mi a swaseha ku Yena. Lilato la Mulimu neli mu sweli kwa Linzwi. “Uka lwala Libizo la Ka fapila Bamacaba.” Kacwalo sa ya.

161 “Mushe, KI NA Mulimu wa ndataho. KI NA Mulimu wa Abrahama, Isaka, ni wa Jakobo. Ni hupuzi ne Ni ba sepisize, mi nako ya sepiso i sutelezi bukaufi. Mi Ni boni manyando a sicaba sa Ka. Ni hupuzi sepiso ya Ka. Mi Ni tile ku to ku luma. Mwa ziba seo Linzwi neli bulezi. Ni ku lumile kuli uye teni kwani, ni ku lumile ka mata, kuli uye teni kwani mi ulukulule sicaba sa Ka. Mi ulwale kota yeo mwa lizoho la hao, kakuba bupaki, kakuli uboni makazo ye ezizwe ka yona.” Inge fela sina Davida, ni kafwililo. Mwabona?

162 Kulumiwa, yena kasibili, mi naile kwani. Mafelelezo, Mulimu na bile ni mutu yana Mu utwela, yana lumilwe ku Yena, mi na sa koni ku zamaya konji Linzwi la Mulimu ha ne li mu zamaisa. Kambe batu ne ba ka eza fela ona cwalo, kacenu! Konakuli, yena na tiloba mutamiwa wa Hae, mutamiwa kwa lilato, kuswaseha mwa coko ya lilato, ni—ni Mulimu, sina Paulusi mwana swasehezi kwa coko ya lilato la Mulimu.

163 Sina fela Paulusi, sibeli sa bona ne ba lutilwe ka nzila yeswana. Mushe na lutilwe, mwa ziba, kuli a yo lukulula bana

ba Isilaele ka mata a sisole. Paulusi na lutilwe kuli aba lukulule kuzwa mwa mazoho a Maroma ni ku ba lukulula, ka mata a hae a bulapeli mwa lifasi la zazi lani. Likolo zetuna za ku lutiwa, na hulezi mwatasa Gamaliele.

¹⁶⁴ Mi sibeli sa bona ne baile mwa lihalaupa; nebatile bali baana baba shutana. Sibeli sa bona ne ba boni Siita sa Mulilo. Mi sibeli sabona nebali baplofita. Ki niti yeo? [Puteho ili, "Amen."—Mu.] Sibeli sa bona, baplofita. Mi sibeli sa bona neba bulelezwi ka Siita sa Mulilo, yani ki niti luli, kutaha kwa mulamuleli. Nebali kwani; ne baile kwa lihalaupa. Neba siile malapa abona kuya mwa lihalaupa, ku yo batisisa. Neba siile sicaba sa bona ni lika kaufela, ili kufumana tato ya Mulimu. Mwabona?

¹⁶⁵ Neba lutilwe ka nzila iliñwi; Mulimu na ba cincize kuba basili. Mi neba na ni kuba batamiwa kakutala, ka kusa eza ka nzila yene ba bata, kono neba ezize ka nzila yeo Mulimu na bata kuli baeze ka yona. Yena wa swana maabani, kacenu, ni kuyakuile.

¹⁶⁶ Kana luna ni mizuzu yemiñwi ye lishumi kafo, kuli lu eze seo? [Muzwale Neville uli, "Amen."—Mu.]

¹⁶⁷ Ni ka akufa kapili luli kuli lufite ku mutu yomuñwi. Ni bona alimuñwi cwale. Libizo la hae ki Josefa. Nali mwana ya ketilwe. Nali mufuta wo petehile wa Jesu Kreste. Na pepilwe ali muplofita. Nali muplofita, ni yena. Mwabona? Mi cwale na bonanga lipo. Mi hana sa li mushimani fela, na boni pono ya hae inza inzi fa lubona, mi mizwale ba habo yena inge ba mu kubamela. Mwabona? Kono mulemuhe. Na tiloba . . . Na ikutwa inge kuli nali mushimani yomutuna. Mwabona? Kaufela bona . . .

¹⁶⁸ Kono ki sikamañi seo Mulimu nabile ni kueza? Na ezize lika zeswana za Na ezize ku babañwi kaufela. Kakuli, Mushe nali mulamuleli, Paulusi nali mulamuleli, mi cwale Josefa nali mulamuleli. Na pilisize sicaba sa habo kuzwa kwa lukupwe.

¹⁶⁹ Ki sikamañi seo Mulimu nana ni kueza ku yena? Kumubeya mwa tolongo, ku mu kenya mwa tolongo. Eeni, sha. Muhupule, na lekisizwe ki bana ba habo yena, ku Muegipita. Mi ba mulekisa ku Potifa. Mi Potifa amufa tukuluho nyana, mi, sika sapili mwa ziba, sani ne si zusizwe ku yena. Mi fani ki ha ina mwa tolongo, inza lila, kulila. Mulimu na nani ku mutubula.

¹⁷⁰ Cwale mulemuhe. Kono, ka nako kaufela, Na lumela, yena, mwa tolongo yani, na hupula kuli pono neibulezi kuli na ka ina fa lubona, ni kuli bana ba habo yena neba ka mu kubamela, kakuli na ziba kuli mpo ya hae neizwa ku Mulimu. Mi na zibile kuli neina ni ku to ezahala.

¹⁷¹ Kambe fela ne lu ka buluka sani mwa minahano yaluna, mi ni ka kuya ka Linzwi la Mulimu, kuli mwa mazazi a mafelelezo aa Uka ba ni Keleke, Uka ba ni sicaba. Ni lika ze za Na sepisize, Uka li eza. Na ize kuli Uka peta cwalo, mi lupila mwa nako

yateni. Luteni mwani. Yena usweli fela kulika ku luisa fakuba batamiwa ba niti cwale, baba kiyezwi mwahali ku Yena.

¹⁷² Mukile mwa utwa pina ya kale yani ye mu opelanga kuli, “Mi cwale Ni kiyezwi mwahali ni Mulimu”? Ni bata kuba ya ikwalezi mwahali ni Mulimu. Cwale, kona ko Ni hupuzi ka se. Kuba ya kiyezwi hamoho ni Mulimu, hakuna sesiñwi, mi mu ka zamaya fela Mulimu abulela kuli mu zamaye. Muka eza fela kuya ka mwa bulelela Mulimu kuli mueze, mwabona, fohe kipeto mukiyezwi mwahali ni Mulimu.

¹⁷³ Cwale muhupule, na sweli ku nahana. Ni yena hape na tiloba mupalelwi ya feleleza, ku yena kasibili. Zani kaufela za na ziba, kaufela za na utwisisa, ni lika kaufela, nabile mupalelwi ya feleleza. Ne lisika beleka. Na beilwe mwatasa buino bwa kuli hakuna mutu yana ka mu teezeza. Nali mutamiwa. Mwabona? Na beilwe mwa buino bo buñwi, bo ne basike ba lumela baba sa lumeli. Kana mwabona se Ni talusa? [Puteho ili, “Amen.”—Mu.] Bulumiwa bwa hae kuba bo bu sina tuso. Batu ba sikulula litho za bona. Ne ba sa isezi ngana ku yena mwa tolongo. Ki bunde mañi bo ne bu ka eza bulumiwa bwa hae? Na kona kuyema fa lisipi za tolongo ni kukutaza kubona; neba itamaela fela mwa mikwakwa. Mwabona? Kono nabile mutamiwa. Mi Mulimu na mu bulukile, ali mutamiwa, kufitela lika ha li to ba ka swanelo. Ali, “Kiyo fa muuna wa Ka.” Kanya! Bupalelwi bo bu feleleza!

¹⁷⁴ Mafelelezo, Mulimu natile ku yena mwa tolongo ya hae. Sina Paulusi, sina babañwi ba bona kamukana, Na tile ku yena. Mi Na itusisize mpo ya Na mu file, ku muisa kwande kwani. Yani ki niti. Na mutisize mwa tolongo ya hae. Ki sikamañi sana ezize? Ona fani ha Na mutisize mwa tolongo ya hae, na filwe mata ki mulena, mulena hae, yana inzi kwa tuko a hae, yena yanali mwatasi ahae. Na tisizwe kuzwa mwa ndu ya tolongo ni kufiwa mata; kufitela, sana bulezi kaufela, ne si na ni ku ezahala. Amen.

¹⁷⁵ Mwa tolongo ya hae, na zwelapili kuhupula, na pepezwi mulelo. Na lukela kuyoina bukaufi ni mulena. Kamukana bona ne ba ka yo mu kubamela. Pono ya hae ne imubulelezi cwalo. Amen. Kono pono ya hae isika talelezwa kale ka swanelo, na nani kuba mutamiwa. Amen. Mi kasamulaho ki haba mubusisi. Fani hana zwile mwa ndu ya tolongo ya hae, ni kutoba mutamiwa wa Linzwi la Mulimu, kuli nakona fela kubulela seo Mulimu nabeile mwa mulomo wa hae kuli abulele, mi Mulimu ki ha zamaya kufitela ku yena.

¹⁷⁶ Mulemuhe, kuli Mushe na nani mata akutama bana ba Faro ba bashimani, ka tato ya hae fela. “Haiba mu ka bulela kwa lilundu le kuli, ‘Aku shimbuluke.’” Na nani mata akutama bana ba bashimani ba Faro. Kamba nebali madikoni, kamba baituti ba za likeleke, kamba ki bona ba—ba yemela sika kaufela sene bali sona. Na ize, “Na ku tama,” mi ne ba tamilwe. Sani neli sona.

Na ka eza cwalo ka manzwi ahae tota, ka kulata kwa hae tota. Amen. Kanya ku Mulimu!

Oh, Ni nani fela mwendi mizuzu ye milalu cwalo, kacwalo Ni buluke manzwi aka.

¹⁷⁷ Cwale lu fumana cwana, kuli na—na bile mutamiwa ku Mulimu, kuzwa kwa kuba mutamiwa kwa lifasi. Kuzwa... Paulusi, ka nzila yeswana. Ni Mushe, ka nzila yeswana, kuzwa kwa kuba mutamiwa wa minahano ya hae, kutoba mutamiwa ku Mulimu. Mi ha na zwile, nana ni mata a Mulimu. Mi cwale hana tiloba Paulusi... Fani munahano wa kale, wa Mushe, na itobohile ni kuikambusa ona, na tiloba mutamiwa kwa Linzwi la Kreste. Nakona fela kuzamaya kai ni kai... .

“Mubulela kuli, ‘Kreste?’”

¹⁷⁸ “Na talimile kuswaba kwa Kreste kuli ki maluwu amatuna kufita a mwa Egepita.” Kacwalo nabile mutamiwa ku Kreste, sina fela ona mwana inezi Paulusi.

¹⁷⁹ Muhupule, babalalu ba bona kaufela nebali bapolofita. Mwabona? Mi neba na ni kutubulwa kuzwa kwa minahano ya bona bañi, fakuli babe batamiwa kwa tato ni linzila za Mulimu.

¹⁸⁰ Kutuha fani lwa hupula, cwale, kuli nana ni mata akutama, ka linzwi la hae. Nana ni mata a ku tamulula, ka linzwi la hae. Na kona kubulela kuli, “Na ku tamulula, ka libizo la mulena ka.” Amen. Faro napangile Josefa kuba mwana hae.

¹⁸¹ Kreste u ezanga ba Hae, batamiwa ba lilato, kuba bana ba Hae ba bashimani. Mi Wa ba fa mata, taba yeswana ya Na bile ni yona. Muñoli Joani 14:12, “Ya lumela ku Na,” mwabona, “misebezi ye Ni eza uka eza ni yena. Mane ni yemiñata kufita ye uka ieza.” Cwale mutamiwa wa lilato la Kreste ubanga yafiwa mata ki Mulena hae, Yeli yena Kreste. Amen. “Mi kaniti Ni li ku mina, hamuka bulelela lilundu leo kuli, ‘Na nuha,’ mi musa kakanyi mwa pilu ya mina, kono mu lumela kuli se mu bulezi si ka ezahala, mu ka ba ni se mu bulezi. Ha muina ku Na, ni Manzwi a Ka aina ku mina; haiba mu beilwe kwa coko ya Ka,” kakuli Yena ni Linzwi la Hae za swana. “Kwa simuluho nekuna ni Linzwi, mi Linzwi nali ku Mulimu. Linzwi la ezwa nama mi la to yaha ku luna. Ya swana maabani, kacenu, ni kuyakuile! Ha muina ku Na,” isiñi *mo ni kwani*. “Ha muina ku Na, ni Manzwi a Ka aine ku mina; mukupe se mu lata, kamba mubulele se mubata, si ka ezezwa mina.” Na nani mata.

¹⁸² Mulemuhe, asikazwa kale, nana ni kuzwa inge abeuzwi. Lika ze likani neli nani ku kukuliwa kwateni asika kopana kale ni mulena hae. Mwabona?

¹⁸³ Oh, Mulimu fokuñwi unganga sicaba sa Hae kwande sina cwalo, ni ku beula zeñwi za litakazo za bona kuzwa kubona, ku ba bonisa kuli habakoni nihaiba kueza zene ba tabela kueza. Mwa ziba se Ni talusa. Haba bangi—haba bangi mwa tukuluho

ya kueza se ba tabela kueza. Ba si ka fita kale mwa mata atezi mi baba batanga ba lilato ku Kreste, balukela ku ku kuliwa ni ku ba patalaza. Fokuñwi U ba isanga mwa lihalaupa, ku eza cwalo, ku ba kukula kufeleleza. Mi kipeto ni ku batisa kwande, ya tozizwe, ili kutaleleza mulelo Wa batomezi kuli baeze. Mwabona se Ni talusa?

Bana bahesu, lu inzi kwa maungulo a nako.

¹⁸⁴ Muhupule, linako zeñwi kaufela, Sa ezize. Yena kamita na shimbanga mutu ni ku mu eza kuba mutamiwa ku Yena, ku ikambusa ku za hae. Nana ni ku itoboha lika kaufela za na zibile, kulibala kwa lituto za hae kamukana, lika kamukana, fakuli azibe tato ya Mulimu, ni ku latelela Mulimu.

¹⁸⁵ Hakoni ku latelela sika kaufela seo mutu una ni kueza, ni Mulimu, ka nako yeswana. Ki ze lwanisana, yeñwi ku yeñwi. Haukoni kuya kwa upa ni kwa wiko ka nako yeswana. Haukoni kuya kwa silyo ni kwa nzohoto ka nako yeswana. Haukoni kueza zende ni ze maswe ka nako yeswana. Haukoni ku latelela mutu ni Mulimu ka nako yeswana. Batili, sha. Ulukela ku latelela Mulimu kamba ku latelela mutu.

¹⁸⁶ Cwale, kasumulaho, haiba ulatelela Mulimu mi uipeile ili wena ku Mulimu, konakuli uba mutamiwa ku Mulimu yani, kwa Linzwi lani, kwa tato yani. Hakuna taba ka se si bulelwa kaufela, mufetuha kuba—kuba mutamiwa ku Yona.

¹⁸⁷ Muteeleze. Lu mwa nako ya maungulo. Mi Ni bata ku bulela se ka kuishuwa ni ka likute, mizuzu ye likani ya mafelelezo hainze icibilika. Mutalime. Seo Mulimu, kwa muhupulo wa ka, lu lukela kueza mi ni se lu swanezi kueza, mi ki se lu swanela kueza mwa lizazi le, ki kufumana sibelekiso sa ku kutulisa. Ulukela kufumana sibelekiso, kuli abelekise fafasi. Mulimi kamukana, ha ya kwa kutulo ya hae, ulukela kuba ni sibelekiso sa ku beleka ka sona; kaniti, ulukela kuba ni cekesi ye buhali kamba sesiñwi cwalo, sibiyana sesiñwi, kuli a kutulise bubeke. Mi kutulo ibuzwize.

¹⁸⁸ Mulimu, akulunge mwa lizoho la Hao. Ulueze batanga baba tamilwe ba lilato la Hao. Itusise luna kuba libelekiso, ili kutisa temuho kwa lifasi la sibi le, lifasi lelikutilwe leo lupila ku lona kacenu, kuli Jesu Kreste ki ya swana maabani, kacenu, ni kuyakuile.

¹⁸⁹ Kakuli kuna, Mulimu, tuhela kuli ni be mutamiwa. Haiba mizwale ya hesu kaufela ba ka ni tokolomoha, haiba balikani baka kamukana ba ka ni timboka, Ni bata kuba mutamiwa wa Jesu Kreste ni Linzwi la Hae, kuli Ni kone kuswaseha kwa Linzwi la Hae, ka Moya o Kenile, ku bona Moya o Kenile haunzo panga Linzwi la Mulimu kuli lipakiwe ka lika zeswana zona za Na bulezi kuli lika eziwa. Ni bata kuba mutamiwa wa Jesu Kreste.

Halu lapeleni.

¹⁹⁰ Hani zibi, busihu bwa kacenu, ni litho za luna, haiba takazo ye luna ni yeo, ya kuba sika sisili fela, kamba mwendi ka sika sesiñwi se lu kona ku nahana, kuba sika sa buitati, hani zibi haiba haluna kubeya sani kwa tuko.

¹⁹¹ Hani zibi haiba mushimani yomuñwi mo, busihu bwa kacenu, kotalima kafa ni kafa, kuli, “Ni ka ba sa kuli, ha Ni ka hula, Ni ka ba sika sa *kuli-ni-kuli*.” Hani zibi haiba mwakona ku ikutwa tato ya Mulimu inze i zamaya mwa bupilo bwa mina, mi luli, “Batili, batili. Uh-huh. Na—Na. . . Litakazo za ka lilatehile cwale. Ka mazazi a mafelelezo a likani, Moya o Kenile ubile ubulela ku na. Ni—Ni—Ni—Ni bata kuipa ilina ku Mulimu, kuli ni be sibelekiso sa kuitusisa sa lizazi la mafelelezo le.”

¹⁹² Musizana yomuñwi yomunyinyani yana ni litakazo za kalibe wa mufuta wo munde, kamba—kamba mwendi ki musala mutu yomuñwi cwalo, kamba mwendi zazi leliñwi kuipangela Hollywood kuba bukamusu bwa hao, Ha—Hani zibi haiba ha uitakalezi kuneela takazo ya hao fa Pila Mulimu ni Linzwi la Hae, uutwe pizo ya Mulimu mwa bupilo bwa hao tota. Mulimu wa ziba yo uli yena.

¹⁹³ Hani zibi haiba ku ka ba mukutazi fakaufi, kamba mutanga, mubeleki kokuñwi mwa keleke. Kona ni sa zo kena mwahali mo, hañwi ka nako. Na—Na hanizibi buñata bwa sicaba baba inzi mwahali mo, busihu bwa kacenu, kono Ni. . . sicaba nyana sesili mwahali mo. Hani zibi kamba kukaba mutu ya cwalo, ya ka itakaleza kubulela kuli, “Hanina taba ka sa bulela mutu ufi kaufela. Ni mutanga Mulimu cwale. Ni—Ni—Ni ka kutaza Linzwi la Hae, ku pale ku mane. Hanina taba ka sika kamukana, kopano—kopano yaka haika ni lelekela kwande, Na ni ka zwelapili kuina ni Linzwi lani. Ni—Ni ka eza ona cwalo. Tato ya ka kona tato ya Mulimu. Tato ya Mulimu kona tato ya ka. Ni ka ba mutamiwa wa Jesu Kreste. Ka muhau wa Hae ni tuso, Ni ka eza.”

¹⁹⁴ Munahane fateni, halunze lu inamisize litho za luna. Ki babakai baba na ni takazo yeo, busihu bo? Mu nanule mazoho amina. Ki takazo ya ka, nina. Na ipeya kaufela. Ni litho zaluna zeinami cwale, hanyinyani cwale, hamunze muhupula ka zona cwale, munze mu lapela.

Na ipeya kaufela,
Na ipeya kaufela,
Kaufela ku Wena, Mupulusi waka ya fuyozwi,
Na ipeya kaufela.

Na ipeya- . . .

¹⁹⁵ Kana mutalusa ona cwalo? “Ni bata kuba mutamiwa. Ni. . . Aku ninge, Mulena. Uni ise kwa ndu ya Mubupi, busihu bwa kacenu. Uni lobake, ni ku ni bupa sinca hape, kushetumuka cwalo.”

. . . ku Wena, Mupulusi waka ya fuyozwi,
Na ipeya kaufela.

¹⁹⁶ Ndate ya kwa Lihalimu, pina hainze i zwelapili ku opelwa, Ni hupuzi kuli ye ki taba ye swanela ka nako yona ye, kuli Ni—Ni kutumane hanyinyani kwa pina mi ni ambole ku Wena fa nako nyana. Sicaba hasinze si nahana za kuli, “Na ipeya kaufela,” Ndate, lukonise kueza se, inge kuli ye kona kolo ya mafelelezo ya kueza cwalo. Lutahe ka busepahali, lutahe kwa tafule ya Mulena, sina mone ku inezi, ni liapalo zetapile, mioyo yetapile, tato yetapile, litakazo zetapile, ili kuipeya luna bañi.

¹⁹⁷ Mi cwale Mulimu ange Linzwi la Hae, ku lubeya kwa koko hamoho ni Lona, Linzwi la Mulimu. Mi cwale Moya o Kenile ulunge cwale, halunze luutwa koko yani inze ilila mwahala lipilu zaluna, “Kuzwa busihu bwa kacenu kuya kwapili, Na kunga ka Linzwi la Hao. Cwale musike mwa nahana mihupulo ya mina. Munahane mihupulo ya Ka. Munahane tato ya Ka. Ni ka mi etelela.” Mulimu, akulumeleze kuli ibe kutwisiso ku mutu ni mutu wa luna.

¹⁹⁸ Batu ba sanana babainzi mo; muuna ni musala hae; mi babañwi se ba sutelezi kwa kuba muuna ni musali mwa linyalo. Kuna ni baana bahulu babali mo, babali bakutazi, base babile mwa mukwakwa. Mi, Mulena, ki yo fa Muzwale Neville, Na, ni sweli kuya ni pahama lele. Mazazi a luna asweli ku baliwa cwale. Mizamao ya luna i sweli kuba ka tokomelo kufita mo ne lu i zamaisezanga. Lwa tokomela fo luhata. Ha lu yo ka mihato ya fela-fela, kubulela ka butu, sina mo ne lu belanga. Kono, Mulena, halunze lubona kuli bupilo bwa butu bwa yunda, mi hakuna nihaiba mizamao ya luna yeli ya niti kusina Wena kuli uswale lizoho laluna.

¹⁹⁹ Cwale, Mulimu, aku lunge, Uka eza kana? Inga lipilu zaluna ni tato ya luna mwa lizoho la Hao Luli, mi cwale lube batamiwa, busihu bwa kacenu, kwa Linzwi, ku Krete. Lukonise kupila bupilo bwa bumulimu fa. Mi basali ba, basizana ba banca ba, mitangana yeminca ye, bashimani ni basizana, baitobohe bupilo bwa bona, Mulena. Mi ni litakazo za bona ibe litakazo za ku sebeleza Jesu Krete. Mi lube batamiwa ba muhau wa Hae wa Bumulimu ni tato. Lumeleza cwalo, Mulena.

²⁰⁰ Ki zona ze Ni ziba kueza, Mulena. Manzwi alikani a lobakehile aa, mi Ni—Ni sepa kuli Wena uka abeya hamoho, ka swanelo. Kakuli, kwa cisa mwahali mo, mi sicaba sibata kuteeleza, kono luli kwa futumala hakalo. Mi buñata ba na ni kuya kwa malapa ni ku yoya kwa musebezi kakusasana. Kono cwale lipeu zani hali ine fela mwa lipilu za bona, “mutamiwa.”

²⁰¹ Kuya kwa hae mi ba bulelele musala bona, sina mone. . . basika itukisa kale kuli bakale ku lapela, musihali wo, kamba manzibwana aa, kwa tuko ni mumbeta, kotalimana yomuñwi ni yomuñwi, bali, “Mulatiwa, ku cwañi ka sani, busihu bwa

kacenu? Kana lubile batamiwa luli ku Kreste ni tato ya Hae, kamba—kamba lu beleka ka kulata kwa luna bañi?”

²⁰² Mi cwale mitangana ni likalibe, kai ni kai, sihulu bani baba utwile Liñusa, busihu bo, baipuze bona bañi puzo yeswana yani, “Kuli kana Na itakaleza kuba mutamiwa, ku itoboha bupilo bwaka luli?”

²⁰³ “Yena ya bukeleza bupilo bwa hae uka latehelwa ki bona, kono ya ka latehelwa ki bupilo bwa hae kabakala Ka uka ipumanela bona.” Ndate, lwa ziba, sani ki kuli: lube batamiwa ba Hao, lulatehise litakazo za luna ni tato ya luna, kuli lufumane za Hao, konakuli luna ni Bupilo Bobusafeli. Lumeleza cwalo, Mulena.

²⁰⁴ Taba fela ye Ni ziba, ki ku libeya fela cwale mwa lizoho la Hao. Mi libeye miselo hahulu ni kutisa libelekiso zetuna—zetuna za kutulo ya lizazi la maungulo, baana ni basali, bashimani ni basizana, baba ipeile kwa tato ye petehile ya Mulimu, mi babe batamiwa ba Jesu Kreste, kwa lilato la Hae, baba tatelizwe ka mihala ya lilato la Bumulumu ku Kreste. Lwa li kupa ka Libizo la Hae.

Na ipeya kaufela,

Halu yemeñi.

Na ipeya kaufela,

Kaufela ku Wena, mu . . . ? . . .

²⁰⁵ Halu buleleñi fela cwalo hape, ni meto a luna aitimile ni mazoho aluna mwa halimu.

Na ipeya kaufela,

Na ipeya kaufela,

Kaufela ku Wena, Mupulusi waka ya fuyozwi,

Na ipeya kaufela.

²⁰⁶ Cwale, haiba luinamisa litocho zaluna, mi cwale pina ya kuzwa i sika opelwa kale, yakuli *Munge Libizo La Jesu*, Ni ka kupa kuli—kuli muzwale yo fa . . . Ni libezi libizo la hae. Kezeli yana file bupaki kaza pono ya lififi lene li mu tahela, ya na folisizwe. Mi muhupule, ka kutalima kwa mulaho, lisila ne se liile. Tumelo ya hae kona yene ezize sani. Ulu lukulule mwa tapelo, uka eza cwalo, muzwale? Mi ukupe limbuyoti za Mulimu fahalimwa luna.



MUTAMIWA LOZ63-0717
(A Prisoner)

Liñusa le ka Muzwale William Marrion Branham neli kotalizwe lwapili mwa Sikuwa la Bulalu manzibwana, Sikulu 17, 1963, ili fa Branham Tabernacle mwa Jeffersonville, Indiana, U.S.A., liingilwe kuzwa fa tepu ya magesi ya manzwi ni ku hatisiwa kusina kuzusa sika mwa teni kuya Sikuwa. Toloko ye ya mwa Silozi nei hatisizwe ni ku hasanyiwa kiba Voice Of God Recordings.

LOZI

©2017 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitususwe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangeli ya Jesu Krete. Buka ye hailekisiwi, kuatiswa mwa buñata, ku nepelwa fa moya wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa masheleñi ku sina tumelelano niba Voice Of God Recordings®.

Ka litaba zeñata kamba ka libuka zeñwi ze liteni, shangwe muñolele kwa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org